

蕭山縣志卷之十八

文林郎知蕭山縣事鄒

勤

文林郎知蕭山縣事劉

儼

重修

張崇文重纂

人物志總序

人物志蓋昉於班固古今人表而人各有傳則史
遷列傳之遺也舊志分類五忠節隱逸文苑統入
鄉賢今釐之為類八曰名宦曰鄉賢曰流寓曰隱
逸曰孝義曰理學曰文苑曰列女末附方技取其

有禪於世者焉至仙釋以非聖道不列其有可採者則附於寺庵之後

名宦

蕭自羸秦劔邑越數千載其間建利除害民是務
雖者豈乏其人乃自晉逮宋指不多屈則記籍脫
誤所從來矣至明登載稍廣然徵諸輿誦久暫攸
分固難倖致也是用廣稽近覈存其可知者而闕
其不可知者要本於民無遺訾焉則書之楚人有
言曰以吏繩民民聽於吏以民徵吏吏聽於民聽
吏者有時而聽民者將與世無窮也由斯以譚善
惡之鑒不其嚴乎

吳

陸凱字敬風吳郡人丞相遜之族子黃武初任丞
興諸暨長所在有治績寶鼎元年拜左丞相

府祀

名宦

晉

王雅字茂達東海郟人爲邑令以幹理著稱性好
接下敬慎奉公孝武深加禮遇官至左僕射

府祀

宋

杜守一景德二年以大理丞出為邑令有德政縣東五里山常多虎守一為令之二年虎負子渡浙江去邑人異之名其山曰去虎

蘇壽武功人大中祥符二年以大理丞出為邑令明剛柔決去就民服其治天聖元年守越州摧強灼弊威名大振

李宋卿隴西人天聖二年以大理評事出為邑令明練吏事撫循民情驅逐姦兇訟無留牘

楊時字中立福建將樂縣人熙寧九年進士師事二程講明聖學政和二年為邑令經理庶務裁決如流以邑民歲苦旱開築湘湖灌溉九鄉至今民賴其利四方之士不遠千里來從學號曰龜山先生浮沉州縣四十七年晚居諫省僅九十日以龍圖閣直學士致仕謚文靖詳載宋史列傳祀名宦

顧冲錢塘人淳熙中任邑令抵任適歲旱湘湖水利不均民爭不已冲乃度地勢高下放洩後先勸

蕭山縣志 卷之九
定時刻約束甚嚴又禁侵湖爲田者并酌舊議少
損八鄉以益許賢一鄉民始得其平其他善政多
類此

張暉淳熙中爲邑令寬猛適宜民畏而愛之會諸
暨水溢詔開紀家滙浚蕭山新江以殺水勢暉上
言諸暨地高蕭山地下山陰則沿江皆山疏小江
可導諸暨之水欲浚新江其底石堅不可鑿若開
紀家滙則水逕衝蕭山桃源諸鄉田廬爲沼矣時
蔣芾爲浙東提刑主諸暨之請欲開滙暉力爭曰
暉頸可斷滙不可開乃止蕭邑賴之

郭淵明字潛亮嘉定中任邑令有宿豪父子爲姦
悉置于法民有育孤女利其資失時不嫁者論以
禮律遂得所歸又疏濬湘湖爲利甚博太守刁約
聞之曰郭蕭山壓民望矣

祀名宦

趙善濟四明人乾道中爲邑丞時頑民徐彥明獻
計恩平郡王欲以湘湖爲田善濟力爭之得寢歲
旱九鄉人多爭水構訟集議繕修湖防至今賴焉
方信孺開禧中邑丞剛直有爲吏畏民愛名聞于

時

鄭承議爲邑丞不畏強禦時有朱統制在縣縱牧卒侵刈西興鹽場草鹽司奏其事榜許格捕卒刈草如故亭戶捍之致殺傷其四人朱屬吏以歐擊論死者八人獄成令已署案次及丞承議責吏曰榜旣許人格捕殺之罪輕今以他事論死民甚負冤案不得書我名吏惶懼退易前案八人皆免死

夢什年月無考故不入職官志

游酢字定夫建陽人師事二程時以游楊並稱天

聖中舉進士調蕭山尉辯決疑獄人稱神明在官數年德惠旁洽用廷臣薦召爲太學錄歷知和舒濠三州伊川嘗言游君問學日新政事亦絕人遠

甚

祀名宦

汪綱字仲舉黟縣人知蕭山縣復知諸暨歷浙東提刑改知紹興兼安撫浙東訪求民瘼罷行之疏浚蕭山運河三十里創碑江口以止漲沙甃石通途凡十里中爲施水亭往來稱便所歷多異政詳以戶部侍郎致仕及卒越人聞之相率而哭綱在

越佩四印文書山積而能撫納御煩治事不過二十刻公庭如水下吏一言中理慨然從之

肅祀
名宦

裴思聰至元間邑令廉明謹畏務以德化民天旱蔬食遷居引罪自責雨輒霑足張士誠據浙棄官居嘉興士誠聞其名厚聘之不受憂憤而卒

崔嘉訥字泰舉居延人至正間邑令均稅賦平政治鼎新縣廨役不病民

華凱字元凱會稽人至正間任邑令先時田多蕪沒民失其業凱覈實坵畝官給由帖鄉無爭競至今賴焉

於善至正間由杭州府推官改任邑令性寬厚率民以禮作新學校築堤捍水民受其利後遂家于長山鄉

尹性字本中至正末任邑令邑經兵燹之餘德刑並施安輯流亡歲登民和築吳越兩山亭于北幹山公暇與士大夫登眺以觀民風一時名流有詩紀之其集尚存

蕭山縣志 卷之六
周彥祥寶婺人至順間白五衛教授除邑簿孝行
政績化及都鄙

趙誠宛平人由儒士任邑簿為人端嚴淳篤敬神
愛民禦災捍患歷官江浙樞密院經歷因家蕭山

邑人祠祀之

祀名宦

王振字麟伯大名人任邑尉見義勇為才猷通達
建學之績到今稱之

趙子漸金華人從游許白雲先生辟蕭山教諭每
以綱常大義訓迪後進遠近聞風而至者皆師事
之焉

陳適字文卿四明人家子也由舉人司訓蕭山
敏而好修迪諸生惟以篤行爲先其於重建大成
殿心惟身任偕諭陳處久早夜弗少懈閱四月而
告成事詳張伯醇記中

明

張懋洪武初知蕭山重農恤民尤注意湘湖水利
爲圖記刻石今存於縣儀門之左水利志內備載
斯記焉

王國器徽州人爲政敏捷筆翰如流事無壅滯理
民曲直黑白皎然

姜仲能四川人施惠愛均徭役爲政謹嚴人莫敢
犯

彭彥彬吉水人任蕭山令謹刑罰平差徭人稱其
廉能爲一時最

張崇建安人永樂初知蕭山時方營建宮室供需
煩擾公隨宜給應上不失事下不勞民民甚德之

始修蕭山縣志按張公修誌序年月乃永樂十六
年也職官誌所載張公任蕭則永

樂四年五月竟不
相合以俟訂正

吳汝芳撫州人由刑部員外出知蕭山歲歉撫綏
有方生活甚衆修舉廢墜作興學校三年以疾去

蘇琳山東蒙陰人正統間由進士爲御史出知蕭
山邑產櫻桃歲入貢後遣中官摘取多索常例琳

抗不與中官故不時採之使易壞欲以罪琳琳遂
與中官相格逮械至京英宗問曰爾何爲格我內

官對曰朝廷以口腹殘民內官以威勢虐朝廷命
吏臣是以抗之英宗嘆曰直臣也薄責之令還職

琳曰臣甘受責但使櫻桃復貢蕭民死過半矣自
是蕭邑得免櫻桃之貢

祀名
宦

梁昉順德人由進士任邑令政務大體不矯激干
聲譽幾三年以內艱去後陞御史官至浙江僉事
李鞏武陟人成化間由舉人任邑令會風潮突新
林塘田廬漂没人多溺死鞏撫存患家收掩飄骸
力請藩臬貸鄰郡儲粟以賑之補築堤岸不遑寢
食尋以才能更知長興

陳瑤字仲華廣西全州人由進士任邑令政治嚴
明豪強斂跡征徭田賦行之以公以學舍號房卑
淨湫隘易置爲樓逾兩載以外艱去官至都御史
吳淑字艾夫宜興人由進士任邑令博學能詩文
居官五載創建居多革去奸惡民有所倚後陞監
察御史歷湖廣僉事

朱棣字良用崑山人成化末由進士爲邑令撫字
小民振作士類開濬湘湖強梁屏跡立丁田法頒
行諸郡邑利澤甚溥徵拜監察御史

祀名
宦

趙鑑字克正壽光人由進士任邑令治民慈愛操

守清白官至刑部尚書

秦鎬字子京陝西三原人以進士知蕭山才識明
祭而積弊多刻威斷不撓而強梁懾服官至大同
府知府

張選字舜舉無錫人以進士知蕭山薄于自奉勵
精庶務凡有隱伏發摘如神興利刻弊動中事宜
始刻黃冊畧以杜飛洒至今遵之不變陞戶科給
事中以言事廷杖罷歸

祀名
宦

王聘字念覺山東利津人由進士知陝西藍屋縣

擢兵科給事中嘉靖中以言事出判太倉州遷蕭
山令實心愛民躬行率下廉不欲名簡不廢事誠
能動人威能懾吏尤究心水利纂修圖志任蕭僅
二朞邑人至今思之官至河南衛輝府知府

祀名
宦

施堯臣字欽甫青陽人嘉靖中以進士知蕭山有
幹才遇事亦解甚得民譽邑自初建以來無城先
是屢經海寇始議築城竟莫能就堯臣至之明年
海寇大至他邑無城者被禍尤慘乃力請築城相
度地形鳩工聚石晝夜督率不數月而城成周圍

凡十里堅厚周緻屹然一方保障云績聞擢吏部
主事後寇屢掠縣境城市冥然歌頌不已始蒞任
不挈家屬止携一簾及遷惟增贈言數紙而已官
至順天府尹邑西門外立遺愛祠焉
歐陽一敬江西彭澤人已未進士爲令廉明威愛
人敬而懷之露跣禱雨輒應造版籍痛絕詭寄差
徭始均杖袁相蒼頭無狀者且下之獄其家哀請
乃釋迨召相勞之曰先生風裁夙聞遂除兵科給
事中多所論劾有直聲官至大理少卿

趙睿涇縣人由進士爲邑令沉靜溫厚平易近人
而胸中繩墨井井不可亂在任四年事治而民安
之入爲御史按轍所至動有聲稱

許承周字公旦崑山人隆慶戊辰進士甫蒞蕭卽
摘發吏胥積蠹一日呼其最黠者數人於庭核狀
示之諸人屏息請死判訖隨配遣一縣肅然築北
海塘遏潮溢鳳儀諸鄉賴焉嚙御史以額暨屬公
批驗有大賈以千金爲壽公卻之陳僉憲戚甫以
賈萬壽表自江西歸餘姚道蕭山索厨傳掠吏卒

幾斃公逮其僕弁土莫在道憐橫狀于當事者反
被誣奏罪以稽留素餐竟罷去百姓攀號溯江如
失慈父焉

王一乾字元卿江西泰和人由進士知蕭山誠心
愛民務以寧靜不擾為主如糧里併役申革本山
竹木稅輪八埠船裝防春卒等類皆民所傳頌者
公庭無事皂甲散爲負販有古循良之風焉擢刑
部主事邑人立去思碑

劉會字望海福建惠安人由進士爲邑令舊有折
差之弊每歲折富戶數十名其差攤加于各里戶
里戶差日益重侯盡革之又建西興石塘及龍口
閘爲蕭民永賴其議江南九鄉水利欲濬溪築塘
惜歲連祲不果行侯去後無繼之者

江南九鄉議
載水利志

秦尚明字湛若河南太康人廉明並著減賦額却
例金於署門外飭榜亭置爨器民有持訟牒至者
卽令居此攝被訟者至立爲斷遣監司以寇警檄
募鄉兵侯曰兵不能練何募爲但集民壯加訓練
而已有節推至邑查盤索擾使侯不應被譖去官

民爲罷市奔訴直指監司得補調宜興

沈鳳翔字孟威丹陽人由進士任邑令淡泊自守
爲蕭邑廉令之最在任數年皂役多復業去者後
陞兵科給事中

陳如松字白南福建同安人由舉人任邑令其治
務爲民興利而頗抑富豪曰此所謂放利多怨者
也以蕭邑水東去于形家不利乃築壩截其流別
開雙河塍使水折而南注遶出大通橋又北注以
達于舊道凡爲橋者三建埭者二陞太倉知州

劉安行字澹星湖廣襄陽人由進士任邑令至卽
革折差之弊明敏有爲百務一新僅半載以丁艱
去

顧棻字子凝常州無錫人由進士任邑令至任凡
米鹽蔬菜皆運之無錫不一取于民于內署分六
房日躬董之釐姦剔弊宿猾無所措手邑豪憚之
杜門思避去僅一載丁內艱歸

賈爾壽字祈生北通州人以明經出宰蕭山當軍
興孔亟民不堪命公隨事調度如法軍不敢譁民

不苦役期年解任錢糧七百餘兩印封貯庫慈谿
解寄錢糧四百兩投署內井中毫無指染俱遺後
令因寓蕭之長河村卒於金華之義烏士民哀思
爲之奔喪葬崇化鄉屠家橋之西
卽申明亭基
黎清江西吉安人洪武中任邑丞清慎寡欲勤於
政事在任三年素修無玷民甚愛之

熊以淵靖安人洪武中任邑丞勤謹明察人不敢
干以私陞杭州府通判轉陞泰安知州

阮連南陵人正德中由監生任邑丞居官有守清
操著聞三載如一上下稱重之陞祁州判官

王嘉賓沛縣人由選貢爲邑丞體貌俊雅文辭敏
給嘗署篆遇事亦解操守甚潔不畏強禦未及兩
期撫臺以才薦遷寧津令

蔣思澤全州人由掾史尉蕭居官廉慈却常例不
私受訟牒聽訟絕鞭朴聲後入覲以誑誤去仍來
任所辭文廟別士民以明素志人至今稱其粹白
云

陳顏仍廬陵人由鄉舉任邑教諭學行動敏訓誨

諸生雖寒暑不廢

屠任岷縣人家貧方學能詩文兼工篆隸洪武間任訓導後遷武陵知縣歷刑部主事皆著清節

劉寬泰和人由鄉舉任邑教諭言行動靜皆可爲法

成果鹽城人由舉人任教諭冲夷閒雅延接諸生渾是一團和氣不談貨利足移澆俗陞任留俸金六兩置月考棹

龍訓長與人由歲貢任訓導良玉蘊粹壽風播和

一承盤欵令人鄙詐儂浮之習默奪潛消乃其學問該瞻工於古文詞僅緒餘耳陞教松溪臨行合三百餘諸生送之江潯灑淚不忍別去

魏良翰號東梧德州人由歲貢任邑教諭忠實剛明洩任甫兩月適秋祭邑令入闈禮吏沈德教猾侵祭額頒昨不給名詰之吏反肆狂言遂嘆曰此曹敢辱我師儒耶卽和陶靖節歸去來辭飄然解任諸生泣留不得嗟乎清風高節若魏先生者今日竟不可槩見矣

王學孝字欽京國之龍溪人由舉人任教諭博學
多才砥躬飭行嘗書座右以自箴左箴曰要重一
分人品須輕一分財利要輕一分財利須省一分
用度右箴曰要做一分事業須任一分勞苦要任
一分勞苦須養一分精神士林至今傳之學舊未
有志志學自公始

張汝醇字希孟江西浮梁人由舉人任教諭清介
自守而和易近人月有課季有會誨勵不倦所示
學規殷殷懇懇惟以敦行爲重士之有學行者咸
慕從焉

王剪如臯人由歲貢任邑訓導資稟純粹學業勤
敏

蔚楷合肥人以歲貢司訓蕭山端方廉慎不苟取
濫交士之貧者歸其贄代巡舒公汀行部曰方今
司教向上者惟此一人薦擢絳州學正道遠行無
資貸數十金三年而計息不遠萬里遣人來償人
益高之

岑子原南海人永樂初任錢清北壩官廉潔有爲

夫役畏服

國朝

韓昌先字榮宗遼陽人由貢士任邑令侯不嫻文翰而蒞事明敏政寬刑簡立里甲均當法使徭役均而詭寄之弊亦絕至今遵之卒于官民爲立祠西郭以祀之

賈國楨字蒼嶠山西曲沃人由恩貢任邑令蕭密邇省會營丁渡江畜牧大爲民害而其患有二曰盤債曰賭民一罹之雖高資立盡至有波及族

戚鄰里者酷刑拷掠守土官莫敢呵也市井則更有馬保掠買之患侯至而三患屏除視事一載吏民畏懷旁邑聞之質成踵至盡瘁二載病卒于官

邑民哀之爲罷市三日立祠江寺禱賽如市焉

署縣

會稽邑丞江西新昌趙驥送韓賈二令人名宦文附錄嗚呼蕭民其猶不忘舊德也夫韓公賈公治聲政績掩映于蕭蕭之民相與沐浴而咏歌之憶賈而益以思韓思韓而益以念賈以今康熙六年重九後二日晉二公于名宦夫名宦之列惟其功不惟其位顯位非功不著功非位不傳匹夫行善不出閭里爲其快于量也若以百里侯而沛澤流膏行慶施惠亦何往而非其見德之地今韓侯賈侯之所沁入于蕭民之心者深矣顧名宦之定于數十年之後者其常若官之方殂而卽不能釋然

于其所以官此之心如著燭賈公者是又人情之所僅見而罕邁者也其爲之前雖美不彰莫爲之後雖盛不傳韓公名宦之請蕭之民鬱而有待韓公之德固有藉于賈公闡揚而光大之矣趙驥署蕭事蹟一准邑庠生丁克振等條陳請改吏收官解永除里長收糧民害一節制營兵鞭假營地規丁江寺不印旗下收買本地子女文書一修建築司隨經通詳各憲凡遇滿漢上憲往來駐劄禁借民房一聽訟明決事無大小審語當堂立就一結魚嘴錢塘爭界赭山海寧爭界力爲蕭邑紀者宦周嗣愷字舜臣衢州西安人由序貢任訓導獎掖士類有正己淑人之雅學宮久圯公率先首議士紳激勸堂構一新陞保定府經歷卒蕭士爲祀于報功祠

徐則敏字元白湖廣應城人以拔貢知蕭山廉恕公明節愛忠直民遇之如得慈母焉政事無一不得民心卽清丈田畝一項蕭山自萬曆九年辛巳至康熙四年乙巳曆八十五年公始丈量感額曰吾何忍以此擾民令百姓自丈吏胥無從上下其手借端生事者許卽想理時出履畝抽量自備糶殮戒飭徒役雞犬不驚視他邑紛擾者蕭山獨受其福矣後以月單註誤士民數萬赴憲懇留任不得去之日扳轅號送江滸各憲聞之嘆息至今人

蕭山縣志 卷十八
猶思慕不置

盛旦號大恥性孝友博學篤行由舉人諭蕭山甫
至遂建明倫堂學宮齋署俱次第修舉郡守張公
三異監司史公光鑑咸親視加敬禮焉接引諸子
儀範端偉望之悚息貧者歸其贄賑乏無靳吝因
校讐郡志勞瘁得病臨卒惟以未遑鼎新 聖殿
爲歎諸子私謚文恭先生

劉儼號鉅夫北直景州人由官監知蕭山縣事十
餘年廉能明斷百務具舉甫下車首建 聖宮蕭

邑西江塘爲害甚大公捐貲修築更申詳各憲均
派山會二縣協濟塘高而固民賴以安舊例築塘
毀田每里原有應徵之費後以編審清出地池銀
兩抵之一清現年賠累邑爲吳越通衢往來道路
枯骨最多公令有主者收之無主者瘞之種種善
政不可枚舉通邑德政公啓云櫛風沐雨不敢告
勞披月戴星無時豫怠爲嚴父寧爲慈母赤子盡
荷生成事保障不事繭絲白屋總歸覆肩讀法讓
齒敦孝弟而重

朝廷建學明倫委聖賢而親儒雅朗照實由水鑑桃
李盡入公門濯魄自在冰壺苞苴永辭暮夜不先
時不後時供之惟正毋失入毋失出慶在咸中捍
大患於西江春水桃花無恙瘞枯骸于北幹荒原
宿草更生當大造而清查按畝會無隱漏痛浮糧
於加派蠲除頓異從前免值月之私徵革現年之
包攬處分必著親族息訟獄之繁興重犯痛絕株
連杜冤讐之誣陷汰毀田而催科不擾裁小甲而
冗役無譁嚴刑必及強梁拳勇斂跡保甲實行編
戶奸宄潛蹤胥役不到窮鄉自見寧于雞犬物價
惟平司市勿致短于絲毫若乃河潤九里餘波旁
及隣封粟指一困急難頓加涸轍鳩形鵠面全活
者百萬家白叟黃童謳頌者三兩邑載其略記其
實也士民感之以爲卓魯復生云

張翀字慎菴杭州臨安人由舉人諭蕭山質樸醇
謹訓迪一歸誠正甫到任見 聖殿傾圮力議重
建捐貲起工設主設額煥然改觀

鄉賢

傳曰賢者識其大不賢者識其小莫不有文武之道焉由此觀之識大者賢也識小者非賢乎小大兼述稱美不稱惡志之體宜爾矣自三國迄今蕭之鴻卿鉅公暨文學論議之臣間巷砥行之士卽賢有大小其于先民均稱典刑焉是用論次其世揭著于篇

吳

鍾離牧字子幹會稽山陰人漢魯相意七世孫少

與同郡謝贊吳郡顧譚齊名居永興躬墾田二十畝禾登縣民爭之牧不與競縣長召民繫獄牧爲之請得釋民慙率妻子春禾得米還牧牧不受輸置道旁莫有取者赤烏五年從郎中歷遷中書令會建安鄱陽新都三郡賊亂出牧爲監軍使者討平之封秦亭侯越騎都尉永安中以平魏將軍領武陵太守會魏郭純誘致諸彘進攻西陽牧率所領晨夜進道斬渠帥及其支黨純等散走五溪平進封都鄉侯卒于官家無餘財士民思之子稭嗣

代領兵少子狗自有傳時始興太守羊道與太常滕書稱之曰鍾離子幹吾昔知之不熟近見其在南海恩威智勇部伍分明加操行清純有古人之風其見重一時如此

祠府鄉賢

鍾離狗牧之子也拜偏將軍戍西陵與監軍唐盛論地形勢謂宜城信陵爲建平援不然敵將先入盛以建平將施績有智畧而不言信陵當城弗從狗計後晉果修信陵城建平遂危及吳亡狗領水軍臨陣督戰死

宋

孫處字季高會稽永興人以字行武帝征孫恩季高樂從及平建鄴封新番縣五等侯盧循之亂武帝謂季高曰此賊行破非卿不能傾其巢窟季高率衆三千汎海襲番禺拔之循父蝦長史孫建之等輕舟奔始興季高分遣振武將軍沈田子等討平始興及南康臨賀始安嶺表諸郡循於左里奔還襲廣州季高又破走之卒贈南海太守封侯官縣侯武帝念季高功表稱所褒未優贈交州刺史

列

戴僧靜永興人少有膽方便弓馬事刺史沈文秀叛還淮陰魏軍至僧靜應募出戰單刀直前魏軍奔退又追斬三級宋昇明中袁劉舉兵蕭道成遣僧靜助蘇烈攻袁粲踰城獨進粲子最勇以身衛粲僧靜直前砍之粲父子俱死齊高帝卽位自寧朔將軍封建昌縣侯永明五年桓天生引北魏兵寇泚陽將軍陳顯達遣僧靜與戰于深橋大破之後除南中郎司馬淮南太守愛民惜士甚得物情

永明八年荊州刺史巴東王子響殺長史司馬齊
主召僧靜討之僧靜曰巴東年少長史執之太急
忿不思難故耳天子見過誤殺人有何大罪忽遣
軍西上人情惶懼僧靜不敢奉勅齊主不應而心
善之遷廬陵王中軍司馬高平太守卒謚壯侯

唐

賀知章字季真永興人性曠曩善譚說族姑子陸
象先嘗謂人曰季真清談風流吾一日不見則鄙
吝生矣嗣聖初擢進士累遷禮部侍郎兼集賢院
學士元宗自爲贊賜之肅宗爲太子遷賓客授秘
書監知章晚節尤誕放遨嬉里巷自號四明狂客
及秘書外監每醉輒屬辭筆不停書咸有可觀善
草隸好事者具筆硯從之纔數十字世傳以爲寶
天寶初病夢遊帝居數日寤乃請爲道士還鄉里
詔許之以宅爲千秋觀又求鏡湖數頃爲放生池
詔賜鏡湖剡川一曲旣行帝賜詩皇太子百官餞
送卒年八十六贈禮部尚書

夏香字曼卿年十五縣長葛君會客飲晏時郡遭

大旱問香以旱故答曰昔湯遭旱七年以六事自責而雨澤應澍周成王悔過而偃禾復起自古先聖畏懼天異必思變以濟民命今始罹天災縣界獨甚未聞明達崇殷周之德飲晏獨懽百姓枯瘁神祇有靈必不享也百姓不足君孰與足長曰是誠在我卽罷會身捐俸祿以贍民饑衆服其格言後歷任邑長聲譽四聞

宋

王絲

王絲字敬素真宗時舉進士任興國軍司理辯重辟十有一人郡稱神明秩滿除台州軍事判官州少井人病之絲陶土爲筒引山泉入城每五里一穴以濟行者旋判衢州有惠政外臺移領婺州衢州人爭于境上曰吾州一鑑何爲見奪至婺雪民冤抑民德之以紫檀肖像而祀之拜侍御史會湖南蠻攻郡縣詔絲安撫湖南至則諮察利病前帥懸重賞以誅蠻人一級萬錢士卒往往戕樵餉者以爲功絲下令得賊首者必指其鬪地以爲質其

可擒者當生致之自是無枉戮者終尚書兵部員外郎子壽震露並列顯職狀元馮京其婿也同年范文正公誌其墓今存碑牌嶺

沈衡字公持先世不仕從外兄王絲學登進士自校書郎遷職方郎中爲人嚴整精于吏事民憚其察不敢有犯

顧沂生三歲與諸兄育于伯父迨長奮志於學伯父奇之登進士至朝散大夫轉光祿大夫父務德贈中順大夫子彥成承蔭朝散大夫兩浙運使以書堂爲學基田三十六頃爲學田中書舍人薛昂誌其墓

張孝伯歷陽人父寺丞來寓蕭山因家焉登進士仕至華文閣待制學士知隆興府又知鎮江府召同知樞密院事嘉泰四年進參知政事尋罷歸時韓侂胄方目道學爲僞黨禁甚嚴貶斥正人殆無虛日公謂侂胄曰不弛黨禁恐後不免報復之禍侂胄然之自是黨禁寢解貶斥者漸還故職正人始有所容

張卽之字溫夫參政孝伯子也以父郊恩授承務
郎官至司農丞告老特除直秘閣致仕翰墨之妙
著聞天下生平志行尤卓然云

張飛卿少聰敏詩書子史涉獵如流登進士授
州觀察推官在任執法有論之者降授崑山簿治
跡著聞尋陞通直郎

張叔椿字景韶由進士拜殿中侍御史紹熙中請
帝朝重華宮又兩劾留正擅去相位直言不避斧
鉞一時權貴皆憚之出守建寧三衢皆有廉能聲

累官叅知政事觀文殿大學士子復初尚理宗姑

長興縣主封永國公

祠鄉賢

張稱孫字秋顏永國公次子紹興中歷樞密院都
承旨理宗時除寶章閣待制兼端明殿大學士嘉
禧間督視江淮兵馬拜太師平章軍國重事進封
祈國公性鯁介不附權貴與賈似道有隙遂謝事
歸以泮宮在芹沂橋者非吉壤市邑西地遷焉仍
助田若干以供學廩未幾上悟復召以丁母長興
縣主憂不赴寶佑間詔爲榮陽郡王詣闕辭爵稱

肅州府志 卷三十一
一
旨復平章事 一朝入中書視事如故及薨上

震悼輟朝 靖王諡忠獻

祠鄉賢

明

顧觀字利賓一字孟文號省齋八歲詣外祖蘇氏家得百將傳一覽不忘及十二通五經善屬文年十六適洪武開科遂以書領鄉薦第一明年成進士太祖甚愛之日侍左右遇有咨訪呼曰小翰林太祖嘗訪天下利病對曰法徒罪以上悉廷審臣民皆苦其煩請自死罪以下悉從外省徑決上允

之遂爲一代定制擢大理寺評事各審獄必令唱名卒於官年纔二十有四魏文靖公驥嘗從之學懽其無嗣爲設主祀之其詞翰多所遺落僅存趙彥和墓誌草書法文體真翰苑名筆也

祀鄉賢

一 魏希哲字原明性剛方明春秋元末遊都下遭亂從海道歸盜掠其資去惟他人所附金獨存悉歸之其家人皆義之洪武丁丑膺老成薦任江西上高知縣戶戶刁奸公鏘強培弱德威並著致仕年八十卒於

其登進士授翰林院庶吉士驥

歷官吏

王士貞 吉極力讀書不與俗伍對人論事必

屈服其心下筆賦詩不忘君親臨虞帖學李篆通

真可觀洪武六年舉秀才授給事中凡御製詩文

悉令錄之因其身短太祖稱小秀才權監察御史

多所論劾有搏擊聲九年新立中書調為長自陳

致仕賜寶鈔拾錠兄士喆同舉秀才 貞有貽笑集 喆有知白集

姚友直洪武中進士授中書舍人改翰林侍書永

樂初斬賊王驤王皆以皇孫年少未之國上以為

輔導宜用止人拜司經局洗馬進左春坊左庶子

授二王經匡扶以禮不激不阿兩府皆敬重之仁

宗即位滕王始建國雲南上欲使終相王遂以為

雲南布政司右叅政領滕府長史事宣宗即位將

郊祀召為太常卿歷事四朝剛介廉慎沐恩寵最

優方期大用以疾卒于京賜葬祭如制少傅楊文

定公志其墓 祀鄉賢

張經字孔升洪武中以明經舉累官國子助教靖

難師入城將棄 歸時事出倉卒夜半縋城而下

幅巾野服絕口不言時事人亦鮮知其心者博學
多才爲一時儒宗同邑魏文靖公殷魯二御史姚
太卿諸暨王編修鈺皆其門人也晚年以棋隱更
號橘樂年八十餘而終有詩文若干卷行于世

朱仲安漢太尉雋之裔以詩中洪武庚午鄉試授
河南鞏縣學訓導因言事遷武進縣簿以善政聞
太祖遣行人齎幣旌之有正巳帥物廉能愛民之
語進知縣永樂初擢福建道御史扈駕北征有功
陞湖廣按察副使改交趾坐逮降山東御史奉勅

考察會都御史缺上命署院事巡按貴州河南居
官廉重臨事必存大體聲稱籍甚以學行見知于
仁宗一日顧侍臣曰朱仲安御史中之翹楚也朕
甚重之錫勅命資寶楮爲道里費使歸焚黃宣宗
識其材特陞河南按察使入覲課爲十三道風紀
之最進通議大夫卒于官周王重其爲人賜詩誄
悼之遣儀賓錢欽致祭今府縣鄉賢祠皆祀之
魏驥字仲房號南齋上高令希哲子也出後上高
之兄伯雅永樂三年登鄉榜授松江府學訓導師

道嚴而有恩與諸生冠衣相對不問寒暑每夜分
潛往號房聽諸生有誦者供以茗粥咸感奮有成
公各由是起典試江西凡再往榜首陳循尹鳳岐
皆所識拔厥後朝省右地如劉學士定之輩多江
右人率公兩試時所取士也召修永樂大典遷太
常博士累舉同考會試甲辰從征凡軍國大事悉
與聞歷太常少卿正統初進吏部侍郎畿甸蝗奉
命往視悉殄之時中官王振怙寵而驕每出公卿
無不歛避驥遇之不顧振銜之譖于上上以問公

公慷慨曰臣備位六卿臣不足惜如朝廷何上溫
旨慰之尋以老辭調南京吏部九載入見乞致仕
不許進尚書已巳之變條陳諸策多見施行景泰
初四乞骸骨始得歸時年七十有三矣家居二十
餘年布袍素食不別治生惟率鄉人計修湘湖以
防水患成化七年公齡九十有八上遣使存問賜
以羊酒粟帛未及拜命而卒先時有大星隕其隣
王文政庭中公疾旣革忽就枕口占云平心不作
虧心事一點靈光直上行儵然而逝其子完以遺

命辭免營墓詔從之賜謚文靖陪祀 德惠祠以
公與楊文靖公均有功于湘湖也公爲人端慎簡
默清苦自勵好別白君子小人品量之下人輒以
爲信同列後進有過必面折之不恤怨誹當鄉舉
時聞父病不俟檄棘而回事其兄主事騏老而彌
恭蒞官所至崇正抑邪務存大體山川壇獲白兔
圻內升瑞麥皆却勿奏在南都時法司因旱恤刑
有巨惡王綱者稱寃覲免或以年少欲緩之公曰
此婦人之仁天道不時正謂此耳獄遂決翌日而

雨所著有南齋集松江志水利切要理學正誼

書

祀鄉賢

殷旦永樂初進士爲監察御史敢言自任不避權
勢錦衣衛都指揮紀綱怙寵奢僭旦劾其奸惡數
十事綱遂棄市自是貴倖斂戢當時有殷旦入朝
百官失色之語拜交趾按察司副使黎利叛安南
復沒于交趾悉逐朝廷命吏易以所親獨畱旦欲
用之旦不屈自經死交人義之具棺衾送其妻子

出界上

祀鄉賢

何善由進士任監察御史洪熙初勅遣巡行南北
直隸并浙江鈔法鄉郡吏民一無所私威望大振
至今稱之

張嶺字時峻以進士知上饒奏課吏部考第一遷
南京工部主事性鯁介不畏強禦故事有內降至
南都主事手錄之以呈守備太監嶺不顧尚書趣
之嶺曰主事非書手何錄爲竟亦無他歷刑部郎
中時隆平侯張祐無嗣弟姪爭襲賄逆瑾致囑嶺
持正不阿出知興化瑾又陰使莆田探花戴大賓

出其妻而妻以兄子復囑嶺嶺亦拒不許瑾乃矯
旨罷歸瑾誅起知南雄南雄當廣商出入之區前
守多以污敗嶺一無所滓名大起歷江西布政司
使時宸濠潛蓄異謀懼嶺掣其肘爲之賄改南光
祿卿轉副都御史巡撫保定值武宗北巡與佞幸
錢寧江彬輩相抗重拂上意卽引疾歸寧彬誅復
以薦起鎮守兩廣擒巨寇黃鏐等有功尋入掌南
臺改南京工部尚書以老致仕年七十四而卒賜
祭塋上饒南雄並祀之子允江西都司經歷恪守

清白能世其家云

祠鄉賢

盛瀧字源之登進士初知臨淮終南寧守為政嚴明一毫無所染以直忤當道解官歸行李蕭然既抵家惟杜門讀書不入城府臨淮人久而思之御史以巡鹺按浙知其餽粥不繼延之入省飲款甚洽瀧終無所言一巨商敗法當戍攜千金因瀧子以請子乘間謂曰父忍坐視兒輩饑寒以死耶瀧曰吾誓不以饑寒易晚節子悟還商人金相與甘困不悔越中稱清白吏必曰盛南寧云

余閱王學孝學志云

顧廷諱朱憲長姚太常盛南寧縣志所載四鄉賢也今制春秋二仲禮祀鄉賢三先生皆祀于祠而南寧不與焉嗟乎公之清節至使子孫不克自振以祀公于鄉賢是公之不祀鄉賢者乃其為鄉賢也歟學論盛旦識

倪敏字時勉幼岐嶷莊重不逐群兒戲嬉景泰庚午以三禮魁兩浙歷湖口蒲圻武昌學博其教專務躬行實踐三秉文衡

景泰丙子廣西天順乙卯山東壬午四川皆為主考

所得悉稱名士因父喪解官哀慟成疾竟不能起

時更稱其孝焉

富珖字 成化辛丑進士歷閩臬僉七興學校

省刑罰政皆平易才敏而慮周致仕晉階副使養
高林下值侍御何舜賓清理湘湖罹慘禍珙係何
壻乃破產助子何競復仇幾遭冤陷幸廷議不准
得繼舜賓之志刻湘湖水利志書傳世

陳殷字純輅由序貢守師宗州耿介絕俗一介取
與未常或苟致仕還八月同鄒令魯觀潮於海樓
鄒曰錢塘真險哉殷曰此江險而且靈凡貪官暴
吏多溺其中鄒卽罷席而殷亦莫之顧也鄒去楊
公鐸來謂殷曰聞此邑好毆父母官耶殷曰愛民

如子民亦愛其父母若暴戾如鄒者恐不免耳楊
笑而然之姚江令內召姚人魏都憲瀚守制在家
易服送至江漕殷遇之曰魏先生國之憲臣家之
孝子而變素卽吉送人於五百里外倒置甚矣魏
赧然改容敬謝之其剛介類此

張燭字汝玉貌類木訥而中實敏悟常兩修縣志
成進士視政冬官督兩浙積歲羨祿致萬金於家
帑除刑部郎蒞決淮陽存活甚衆因疾致政其詩
法子美獻古草書近懷素馬一龍畫於元四家及

文徵明陳鳴野各得其似所著有思堂橋宦遊集
若干卷

韓惟論字仲言少警敏穎異爲文清灑飄逸性不
耐靜坐沉潛作一義輒行遊街市遇友卽共爲歡
稿就亟歸而錄之人莫知其構文也嘉靖丙午獲
雋司教沙縣談經講藝他學執贄受業者踵相接
遷汝上令以文學飾吏治時稱神君丁艱歸百姓
挽留遮道汝上人計其服之將闕也相率而請於
朝願借韓令一年穆宗命銓曹懸缺以待而惜乎
不起矣汝人聞之南向遙哭甚哀汝上古中都也

昔孔父嘗宰於此地人思韓不置立祠肖像祀之

祠傍中郡

手

翁文字本道性穎悟歷九舉弗第由歲貢授河南
府學訓導開明經學分俸給貧居鄉請建漏澤園
收掩遺骼海塘潮決呈舉修築鄉人感其惠所著
有縣誌補遺北遊南還咏史等集

祠鄉賢

黃懌字德和由舉人知安溪有惠政民立石頌德
祀之名宦判常州益著聲績家居禮讓非公事不

見邑令質行可表鄉閭子九臯舉進士居鄉嘗上書築西江塘至今賴之

翁五倫字大經文之孫也幼孤資稟穎異髫髻能文登嘉靖乙未進士初令饒平化行彙俗交薦于朝擢御史巡山海關時朶顏擾邊請增貢數倫宣示威德邊境獲寧再按真定妖人以白蓮幻術倡亂倫與巡撫協謀擒殄渠魁全活者萬計三按雲南爲權奸所忌出守福州考績歸省五疏終養母蕭氏苦節最著性嚴倫先意承志長跪受教與人

處坦易可親惠施宗黨各得所欲至懇請賑恤力

疏築城議排年收糧戛平田賦之法尤大有功于

蕭祠鄉賢

來汝賢字子禹號非泉自幼聰慧絕人日誦數萬

言博極羣書嘉靖乙酉壬辰兩試皆魁多士初授

奉新知縣改丹陽入爲禮部主事以疾請告卒所

著有統藝及詩古文遺稿後十餘年而孫學古詩

文翰墨擅譽一時登甲辰進士爲東莞令丙午巳

酉廣東鄉試程文皆出其手其同學張燭張誼黃

世科王仲山咸登科甲以文名海內云

汪榮字子仁當元季饑亂公解衣推食卹貧助葬
勇于爲義尤加禮賢士大夫人多稱爲長者明太
祖定鼎建業召至京欲官之辭不就劉誠意伯基
宋學士濂等皆公友也率一時名卿餞之都門外
皆爲詩以贈誠意伯又繪長江風雨圖以寫其扁
舟徑歸之致焉卒眉山蘇伯衡誌其墓

原載孝義

來勵字宗諒隱居冠山雅爲魏文靖公所重嘗作
生廣公爲記之有曰竭力事親緝譜敦俗勤儉持

家忠信勗守又云正統中兩輸粟五百石以應詔
至冠帶則辭曰民職當然又贊其像畧云得詩書
之趣具田園之樂吟咏以適性情動息以安耕鑿
或臥石以眠雲或經丘而履壑待人篤于忠厚奉
已恬于淡泊禮義靡愆墮今古有商確直氣浩浩
乎胸襟清風漠漠乎寥廓有子有孫無愧無怍噫
欲究其爲人豈不猶珠藏于淵玉韞于璞者耶著
四訓八誡垂示子孫世守勿替

祠鄉賢

來天球字伯韶由弘治庚戌進士授工部主事分

司洪上疏壅閼時蓄洩居民賴焉陞陝西僉憲督
捕劉賊餘黨藍五等皆殲之時藩府縱恣民不聊
生公爲禁戢俱循約束錄平賊功連擢本司使以
忤權貴謝歸家居所建置皆有益于民詩翰入能
品秦蜀多存其石刻祠鄉賢
任美字邦端以字行其先世任長者好行陰德公
尤慷慨勇于爲義邑東街衢欹側公爲疊石行旅
便之湘湖水蓄洩由鳳堰閘弘治七年大水盪啗
堰址崩塌公輸金醵治民賴其利故尚實行賑濟
貧乏皆世所未有

來瓚號樂菴性任俠遣子夔遊學江淮間厚其貲
俾得結納諸名士夔遂爲上舍生舉明經所居地
高亢每苦旱涸公堤倘湖石壁湖缺嘴湖以溉田
遂爲腴壤郡伯聞其事禮請督建長山閘時公帑
告匱公捐金成之自繪其督理畚鍤工役之圖於
長山廟壁焉歲饑又捐米百石以賑撫按上其事
劄授承事郎給冠帶

徐官父洪成化乙未進士第守與官同正德癸酉

舉人官復登進士清苦自勵歷陞廣西僉事之任不能具裝臨行子請曰家世清白願稍爲後嗣計許之抵任一載無所寄子復以書請官還報曰青天白日之下稠人廣衆之中豈可爲此前言戲之耳蕭人至今誦之

載學志

來日升字子旦八歲能屬文父憲使公試以主靜論立就纒纒千餘言咸有根據兩山公嘆曰此真千里駒矣嘉靖甲午舉鄉試第八授興化府判酬應敏贍案無稽牘當道才公檄代守漳南寇盜衰

息民商通利校閱所拔多名士遷守師宗州自以高才滯州縣遂謝政歸逍遙林下工詩詞臨歿作百十言皆淵奧不可測有曰病有千般病心無兩樣心自從天地始混沌到于今人以爲深于道云所著三峯詩文集六卷三峯餘業四卷行于世孫繼韶子集之崇禎庚辰進士集之子燕雯康熙己酉舉人庚辰進士

張試字式言隆慶戊辰進士任休寧令革里甲行條鞭投櫃法設義倉毀淫祠爲社學縣有羨銀二

萬餘兩悉以輸部無私焉陞工部主事創建瓜儀
等關改判辰州招撫天柱諸苗開設縣治陞刑部
郎中神宗時上書極諫謂百官治事未有不坐衙
門家主治家未有不出堂戶寧有爲天子長處深
宮中而能治天下者且引長史欣司馬門故事爲
戒語侵貂豎出爲撫州守建崇儒書院下教墾七
里桃花等陂計萬餘畝卒于任檢其遺篋僅故衣
數襲殘書教卷而已 伯兄誼舉竒童登嘉靖癸

丑進士幼弟諒鄉貢士處家孝友教子義方足爲

世楷訓臨海禱旱有應士民歡頌具載白嶺人文
志歷永春沔陽承天課士實修而文章以之越守
劉庚匾曰同胞三俊邑人咸以是呼之

何世學字文甫父瞻性孝友同母弟墮爲府椽負
庫額二百金日受箠楚翁買已產代輸于官家就
窶歲除有哭于路者詢之乃失償煮之金計無復
之翁惻然卽罄橐盎與之擲其券其急義如此後
以公贈承德郎公登隆慶戊辰進士令丹徒邑當
南北之衝漕渠江防百費雜出又更大水民多逋

賦公節用緩征公私兩裕以憂去任邑人建祠于
漕隄生祀之後補蠡縣旋擢都察院經歷以風裁
著廷議轉公寺卿時相張居正素啣公讜直出爲
常州二守遂謝政歸居鄉力行任郵議建固陵石
隄人尤稱之

載學志

來三聘字任卿以恩選入南雍登萬曆癸未進士
初令黃梅郊行遇風揭輿蓋公以符捕風俄而風
捲符萬工池探得一屍縛甕下公按其事抵殺人
者于法舉邑神之調合凡合肥無麥給之種明歲

大稔民賴以活歷樞部職方郎釋一武弁冤弁持
金謁謝公叱之曰吾以法貰汝乃反相污耶累陞
叅政備兵兗西解散劇賊撫賑流亡嘗按察使董
泖河役功最遷江西布政使庫多羨金一無私焉
卒年七十有三所著有西輶漫稿薄遊吟

祀鄉賢

任宗湯號始吾登萬曆癸酉鄉薦授滁州學正以
文行爲士所宗直指崔廷試令著尚書講意書成
刊布海內巳卯聘典陝西鄉試得士劉宇等六十
五人陞黃縣令時山左苦旱禱萊山之神春雨霑

足麥穗兩岐迨秋禾穗復兩岐貴人以為公德政之應建兩瑞堂併歌詩以紀其事丙戌入覲臺薦循良第一為權貴所忌遂致仕後二十年浙撫淄清高舉以羊酒文幣禮之顏其廬曰東土循良戴尚志字養吾以舉人誦薊州陞國子監陳六事皆見施行歷水部郎盡革冒破乾沒之弊節省虛價五萬餘兩出守筠陽凡所追攝以紙符代隸下里正而已建倉易兌奸無所容遷雲南副使兼驛傳屯田權豪無敢侵隱阿先叛亂公徵發軍需動中款會民不知兵署布政與臨沅三道俱有著績及歸里薊州崔呈秀門下士也附魏閣時貽書幣致候詢公子名欲官之公却其幣大書于庭戒子孫毋得遠遊將為不孝事其剛介老而彌篤如此以高壽終祀鄉賢曾孫鏞曾補庠士好善樂施捐貲以贖難民捨棺以收野殍助學田脩地道事關江湖利害必倡義先輸人咸感之以季子一津封州同其一潤大經克敦世德可方香山范氏焉多以是稱之

倪朝賓字初源登萬曆戊戌進士初任刑曹恤刑
廣東多所平反出知延安府有惠政而尤重士類
大興學宮延師儒論學以爲常陞四川威茂道以
平寇功遷苑馬寺卿轉湖廣按察使其讞獄如前
恤刑時廷議轉布政司有憾公者擠之歸公在林
下頗好黃老家言以壽卒于家 祀鄉賢

王三才字學參鄉舉尚書第一人由進士任虞衡
潔已奉公中貴莫敢干以私督學三晉矢公秉鑑
凡所甲乙悉協輿評本司舊有羨金例入私帑公

以創校士館又于諸郡設倉百餘貯廩以賑貧士
無絲毫染指轉督糧儲歷任徽安尋擢山東布政
使司所至平盜理枉息蝗劭農異績旋著入覲舉
卓異第一晉留京府尹上疏捐俸助邊節冗費若
干以裕國用卒於官贈工部右侍郎賜祭祀鄉賢
國朝康熙十八年詔求遺稿 子命伊字月生廕官
工部營繕司初入部其吏胥譁曰王公子來矣奈
何蓋公父前任是司釐奸滌濫羣胥無由中飽故
也委督重城夙夜在公上閱城見而嘉之獎賚有

加後勅巡視諸陵兵馬繹騷備歷艱險復蒙恩賚
陞都水司是司每以賦敗而公於鋪墊諸常例錙
銖無染爲上所知蓋公父子世以清節著於朝云
終廣南知府 從兄命禹別字玉鳧後侍郎六年
成進士初授工部主事置一奸商於法能名大著
晉都水差督中河值狼矢溝潰修築有方著治河
入議後多遵行之

來經邦字君燮少時能挽勁弓一石馳射多命中
已而折節讀書爲諸生遠巡退讓母病瞽公晨夕
奉侍噫欠必聞搖足展臂靡不持掖時陳說小史
野語可嬉笑者以怡母伯兄憲副君任黔以萬壽
節入賀道病公兼程馳省病劇禱請身代兄病以
甦後歸里兄弟垂白相愛益篤子宗道官庶常公
乘傳入京謂其子曰爾入仕版未建尺寸而父來
輒費官郵數百金若何以酬國留都門數月卒後
以子官贈至一品

祀鄉賢

來嘉謨字莫言讀書慕古下筆千言家貧藉館俸
以給備極孝養後以痺疾臥牀第輟舉子業猶口

吟手錄無開畫雅意小學於點畫形聲考據詳
確晚年仲子斯行成進士芳整裝謁選公忽大書
于壁曰六月炎天一點雪果以是年六月易簣所
著有敦倫寶鑑曲水集字學源流若干卷

祀鄉賢

來斯行字道之登萬曆丙午丁未榜授刑曹代藩
爭立公疏謂貴賤之等不容混廢立之端不可開
朝論違之典試西粵歷陞登萊道白蓮賊徐鴻儒
倡亂公提兵協剿次廣川與賊黨遇公仲子燕禧
先登破之進克鄒滕生擒鴻儒獻俘闕下撫臣匿

其功量陞少參移貴陽總憲水西安酋煽亂特苗

長田阿秧為援公購素習阿秧者偽奔入巢斬阿

秧首以獻諸苗震懾晉福建右布政使引年乞歸

所著有槎菴小乘經史典與塵談燕語論語頌四

書小叅四書問答拈古頌居士傳宗讚運會五經

音詰經史淵源來氏家乘刑部獄志膠萊末議槎

菴詩集行世

祀府縣鄉賢
特祠崇祀

子彭禧字商老山東

蓮妖之亂從父行聞變所籌佐以太學生恩例授

太平府通判晚稱商山老人有蛙鳴詩集若干卷

燕禧字用老爲諸生歲父在登萊後從白蓮賊先
登手擒賊將歸地王在之體賊首徐鴻儒撫臣掠
爲已功量授貴州建寧未幾卒世襲杭州前衛鎮
撫

來宗道字子生登萬曆癸卯甲辰榜選授庶吉士
熹宗朝充經筵講官敷陳理亂辭愷意切上注視
移久始命退班後講員缺上傳聞臣曰去年四月
講書經者補之遂改充日講官所規剴切直中官
忌之遂以禮部侍郎給假家居四年復起南禮部

尚書尋轉北熹宗升遐預受顧命出遇尚書李夔
龍于朝門問曰今日顧命何語公曰傳位信王夔
龍曰公須信得真公曰此何等事豈得作鶻突語
乎于是羣心始定遂草禪詔詣信邸迎王入立天
位乃正公連襄吉凶二大禮詳慎周密中外肅然
是年冬枚卜上召廷臣注名金甌焚香祝天探之
首得公召對文華殿咨詢政要公悉心以陳言者
石畫多見採納天下咸望治焉旋以廷論紛更屢
疏乞休以少傅兼太子太傅致仕馳驛歸里其後

秉軸者卒崎訖公排陷黨籍而公之心事自白也
子杏諷爲諸生有聲蔭尚寶丞未仕卒

陳伯龍字震東登萬曆甲辰進士公凡五爲縣令
並以清介著而數爲權要所排初任江西新建以
卓異徵矣復外調然守正愈不撓所在有德于民
其在湖廣漢川也民有潞糧委官差校之害額銀
三千餘兩橫征至倍公條陳六事定區頭杜波及
酌火耗一準條銀三限遞輸之法民賴以蘇上官
以其式頒行列郡其在直隸獻縣也比歲旱蝗公

令民每田三十畝鑿一井遂不復憂旱里正盜稅
公以邑篆鈐鉏詞牒城隍之神逾十日盜自吐實
以死民驚異之徵入爲刑部主事以外艱歸卒於

家
祀鄉賢

錢穀字府卿龍泓別號也進士珙之子博學多聞
能爲古文詞詩得唐人半韻字有晉人位置畫合
元人門徑時稱三絕云顧屢困棘闈近五旬北上
會平江伯出鎮廣西以千金爲贄請叅幕事堅却
不受名緣是益重徐文長渭贈詩曰白璧不逢知

已獻黃金贈却貴人投正謂此也最後遇鄒御史
應龍欲疏論嵩穀曰嵩未易動宜劾世蕃去世蕃
嵩自危矣屬草疏上嵩父子果獲重譴今海內快
讀鄒疏不知實穀之筆也大奸之去曾與力焉賢
於搏擊爲名高而且受其禍者遠矣

貢士來立相字九山庠生來立模字九畹兄弟篤
於孝友授徒以奉菽水百指同居分甘合食文章
行誼爲遠近所推三吳士出其門者多名公巨卿
立相有取是居稿立模有大觀遺稿後以子方煒
封文林郎繼贈吏部員外郎

並祀鄉賢

來繼韶字舜和性至孝居母喪哀毀骨立遂病消
渴因究岐黃術病尋愈試冠多士廩於庠登乙榜
方期進用爲讒人所構公以義命自安絕口不辨
作可困先生傳以自况遊遼左作徒薪卮言後如
其言爲文入深出顯覃精濂洛之學旁及陰陽卜
筮奇門太乙于書無所不窺晚更好醫戶履恒滿
無倦容常曰此亦仁民一事聊以寄吾志也後以
子集之貴贈如子官

祀鄉賢

王思孝字崑毓生七月喪父孤苦特甚長補弟子
員奉母歸養人以比之范文正少時稱爲王孝子
臺憲屢加獎焉性敏而學苦行文風發泉湧首拔
于學使者三鄉薦登乙榜亦三從其遊者皆知名
之士嘗自暨陽解館歸道臨浦見一人持其婦而
勸詰之乃將鬻之以養母者卽解橐中金與之其
篤行類此以序貢授廬陵教卒于官子鼎鉉登崇
禎甲戌進士初任潮州司李贈公文林郎鼎鉉官
終工部主事 祀鄉賢

來方煒字澤蘭萬曆乙丑進士初令侯官時嚴番
舶之禁公獲奸商籍絲萬觔盡以輸府一無所私
以外艱歸補嘉定令先是民苦重役公立均田均
役之法捐運費省里供民歌頌之舉卓異擢吏部
郎其在驗封屏絕干請在考功文選肅清銓政少
宰以私姻囑公公不爲徇怨者構之獲譴臺諫論
救得免旋轉京卿告假里居民有利病爲力請當
事而最著者竈戶折差等事

鼎革後毀服從浮屠遊隨卒所著有蒙難諸篇子

爾昌舉經明行修授縣令次垣丁未進士任中書舍人孫式鉅甲午舉人

祀鄉賢

韓振強字養和孝弟力田鄉里推爲長者兄居有近宅思得之族人故靳不與公以倍價售之以奉兄嘗往錢塘取桑拾遺金於路坐候其人還之累日家中蠶死矣公不爲意也子存心行誼類父孫日將登進士在江西吉安司李讞獄多平反吉人深得之後擢御史

祀鄉賢

蔡繼曾字宗賓素以孝友著由太學任羽林前衛經歷羽林軍政久弛帥皆紕袴徒以虛伍冒太府金錢公抱長才無所展乃歎曰吾當以王子敬手板歸對家山爽氣爾遂謝歸居鄉濬河建梁賑饑民立義田因心沛澤旣歿鄉人久而思之具上其事從祀鄉賢

施所學號宛委天性孝弟篤學好修而不務虛名治嫁禮交友以誠遇事必侃言無少避雖盛夏時家人相對夜分亦正衣冠其剛直端毅如此由序貢秉鐸上杭三署縣篆摘伏發奸稱神明焉陞福

州諭遽賦歸來世益高之子孫咸稱孝友矜氣節
敦友誼爲能古處者歟

來集之字元成崇禎乙亥特典選拔第一舉庚辰
進士司李皖城皖巖邑也當流賊張獻忠蹂躪兵
賊交訖先生日籌峙糧夜雜卒伍巡雉堞時鎮標
將剽悍楚兵數千撫軍斬格其餉先生披誠開導
始給與鎮兵乃安鳳督馬士英募黔兵道徽祁肆
掠民與格殺傷斃兵將治以亂民律諉先生查核
全活甚衆適武昌鎮左良玉將十萬師東下檄清

君側日無王臣先生長揖而進獨以不可造次爲
言左心折爲戢兵不暴皖得紓旦夕憂士英稔其
才考授樞垣因馬元比周耻附其門士英恚改樞
部未幾朝臣薦復晉貳奉常歸里益留心民瘼西
江塘圯親督修築堅久不潰蕭民苦浮丁勸議照
田均派貧戶賴以蘇困康熙十九年薦博學弘詞
年高不赴初壬午分校南闈拔知名士戚藩等九
人隣房所得士如盧象觀黃淳耀先生力贊曰二
文氣骨高岸必奇英後皆殉節人咸服之公賦性

孝友爲人平易坦直過大節凜不可犯博學嗜古
 善屬文書法章草曉歲讀叅同與黃冠往來終非
 苦縣之學自號桐湖不忘先人課讀處其自誌墓
 銘蓋質而文云所著有易圖親見讀易闕通卦義
 一得春秋志在四傳權衡樵書初二編南行偶筆
 戰筆倘湖藏稿若干卷行於世子燕安登康熙己
 酉鄉薦 又有龍文鞭影行世

國朝

王九思字慎之起家勤儉而好施樂與自崇禎末

入順治初每遇稔歲捐貲賑急不可殫記邑南大
 道爲郡省通衢公義倡衆甃石哀高益下平直如
 砥行旅便之凡廢刹頽宇向公募助者咸慨然樂
 應動輒百十金子先吉康熙庚戌進士贈內閣中
 書孫壇副榜入國學 祀鄉賢

朱世學號拱北幼習詩書性至孝友父病籲天請
 代及終躬負土成塋人以為難常於病涉處設義
 渡以濟行者隣人饑則貸粟而轉賑之家計少贏
 買故家第宅改建城隍廟朔望集士民頌禮以祈

福祐路有遺骼必收而瘞之甚篤於義如此子懋
文官兩淮運副祀鄉賢

周維屏字自求性至孝侗儻負意氣能舉干鈞淹
通經史而泉石自耽賑窮周乏恤死問孤契友返
族中之視鹽泉收水上之尸念外戚無依捐金而
代還身價思遊魂罔倚稽首而屢薦菩提邑有西
江塘公曰此吾邑大利害也命長君之冕躬督修
葺十餘年竟無水患次君之麟登進士現任官詹
學士贈如其官祀鄉賢

任振龍字羽禎長者榮之裔孫也有祖風人有負
公金者欲鬻之以償公止之其八曰吾非獨負公
也公復貽之金使償焉歲終輒取負者悉焚之
曰吾不欲留之以亂方寸其用意頗類如此卒時
家無餘貲子家力學成進士令上海贈公

文林郎請祀鄉賢

朱懋文字懋文字懋文字懋文授揚州幕闖賊陷都城倡
義殺賊斬將軍懋文

清受命清斬獲清

賜蟒衣銀緞卽擢守易州歲漕安民創官驛廣召募
 清虛由豁亡丁革弊除奸民咸戴之詳載利民政
 集課最陞撫州府丞戡橫兵雪冤抑崇仁七集官
 頭之害民者立總之以法會樂安太平賊三千陽
 順陰逆計戮渠魁撫降其衆民有朱書天之頌以
 履任愆湖降補兩淮運副免供應汰冗役革陋規
 鹽法一疏通焉丁酉春歸里仗義疎財重建邑學
 廟門郡學明倫堂并助修郡學

聖殿不啻二千金學之士勸學紀績焉至地方有利

弊必侃侃爲當事言之不少避或干之以私則敬
 謝不敏人以是益重之壬子冬

撫院范公重建萬松書院訪公幹才徵請董理連
 雲鱗次不兩月而落成當塗諸大人無不嘆其神
 速亦其誠實之足以感人也

周一甲字仲文天性孝友事父母能得歡心處昆
 弟無分嫡庶國初由明經秉鐸清溪歷浦江禾郡
 砥行論文悉以湖州法程士造就甚多移判鄞州
 麟殘邑也興教勸農蠶奸詰盜暮歲間大治乃以

年高勞瘁典思鱸膾人益高之其王父諱紹元文
行冠一邑年登九旬王母高氏更嫺壺範壽終百
歲一甲事之晨昏罔間無異事父母焉子諸生之
達國學生鴻逵次子起辛膺博學鴻詞舉現任宣
平教諭孫斐成登丁巳鄉薦繁衍富貴非其盛德
孰能有此

張際龍字雲生國初以拔貢令新化係巖疆孔道
加意撫綏兵戢民安徭蠻服懾歷刑部江南司郎
中央獄悉聽裁奪多所平反種德無涯及守江寧
釐弊剔蠹錢糧嚴禁火耗歲款捐俸賑饑督撫屢
稱清正故三載內兩署糧道一署鹺政一署臬司
所在俱無廢事星出星入備極勞瘁致仕僅半載
竟以疾終真可謂盡瘁國事者矣至今金陵之民
猶深畏壘焉

蔡佳號麗菴力學能文恂恂若處子而每負大志
偶習騎射入泮領康熙丙午鄉薦甲寅闈變隨

平碩康親王征勦屢次招撫僞將王龍呂振憲等三
十餘員士卒千餘人叙功授都司會議進闈招撫

衆皆退縮佳曰生平忠孝自期今何爲焉卽責
論偕同知汪士喟前去直入賊營爲僞將曾養性
所執義不肯屈佳曰予雖武臣寧爲忠鬼遂被害
其子文英正在請卹

理學

學之於人大矣哉世所謂學非聖賢之學也俗而
訓詁靡而鞿梘欲以闡微言而紹絕業曷有當焉
宋楊龜山先生來宰蕭然與游定夫先生一時其
政進多士而提命之於是理學昌明人知傳習嗣
後暢宗風而啓來哲卓然爲吾道干城者魏文靖
公道學德行彪炳古今已登鄉賢傳外僅得數人
亦使後之有志者獲所嚮往云

徐希穀字允宜號也愚弱冠廩於庠研極理學有

得於象山主靜之說而居敬窮理多與晦庵適符
居常危坐至終夜不就枕律言矩行踐履淳篤與
施孺人孝養其親聞於時古文辭規模歐會當世
文人皆自謂不及也以貢授松江司訓時董宗伯
其昌陳徵君繼儒雅負人倫藻鑑咸敬慕之謂先
生德行文章有魏文靖之風焉後任衢州府教授
致仕歸所著露觀書意經意學者宗之弟希聲字
太音方正雅與兄竝師範爲郡邑所推學憲屢獎
優行人謂惟公無忝焉

張訓程字汝範號玉陽安陸外史諒之長子少聰
穎手不釋卷書無不覽遇疑文缺簡不以臆見改
補致功專務躬修爲人誠篤剛毅雖盛暑隆冬必
正容肅坐人聞其聲欬輒凜然不敢犯於綱常倫
理上更有擔當爲督學劉廣生欽重與弟訓懌聞
明宗旨晝夜不輟及司台府淳安率諸生講學多
所啓迪所著有玉陽集憤峯清溪會語若干卷季
子沛祥性純孝恪承父教修身立行爲諸生冠事
百歲母膝下依依不減斑禰萊子撫諸孤任勝於

已兒其英岸端方遇事敢言於邑多利賴焉卒年八十有六

張訓懌字美仲號遠庵秋官郎試第四子也年十七從官江右問業於父之年友羅近溪先生甚器重之歸里從徐允宜先生遊時姚江之說盛行朱陸異同聚訟紛呶先生以克復爲體驗格致爲用功羽翼考亭廓清禪學浙水姚承庵周海門劉蕺山諸先生後先講學俱往就正莫不推爲正宗然雖不好名務求實踐所著有禱過齋集先生至性

誠摯故於忠孝諸大節毫不模糊繼庶難作偕兄弟正名雖家破罹凶初無少遜後庶母陳卒念其爲父守節援慈母終喪之例儒學屠肇芳上其事直指使郭必昌特造廬以旌其孝晚年膺賢良徵聘屢辭不赴造養深遠所見益精生平無疾言遽色學者造之如坐春風中每遇鄉里災患毅然拯救如修塘濬閘濟饑捕蝗舍地掩骼捐資育嬰惠難縷述乃早賦遂初未展大用人咸惜之年七十以壽終於家門人私謚貞靖先生

張遠字邇可候選訓導家居館穀 撫院玉峯趙
 公檄郡縣講敬一錄邑士以遠請允之著敬一錄
 箋 撫院稱賞檄邑令劉署其門日格致心傳所
 著有大易原始詩經晰疑文選會箋杜詩會粹唐
 詩存雅蕉園集等書

蕭山縣志卷十九

文林郎知蕭山縣事鄒 勳 何文煒
 重修 邑文學 編較
 文林郎知蕭山縣事劉 儼 丁夢芝

張崇文重纂

流寓

蕭介吳越之會舟車帶縮形勝融結雖非僑郡而
 寓公每托跡焉卽久暫殊稱乃後先輝映矣夫江
 許秦羅遺文斷簡至今膾炙人口蓋以人存之也
 否則流離之子有類桃梗君子奚取焉

漢

朱儁字公偉上虞人漢靈帝時爲交趾刺史擊斬反賊梁龍命討潁川南陽黃巾連破平之拜右車騎將軍封錢唐侯加位特進後拜城門校尉河南尹董卓擅政關東兵起卓欲遷都關中表儁爲已副儁不受後卓入關畱儁守洛陽儁與山東諸將通謀移書州郡徵兵討董卓卓誅徵爲太僕後爲太尉錄尚書事李傕郭汜之亂爲汜畱質發病卒

嘗寓蕭山子孫因家焉

祀府
鄉賢

許詢字元度高陽人父眈爲會稽內史因家焉詢有才藻善屬文能清言與太原孫綽齊名隱居不仕徵爲朝議郎不就築室永興之西山蕭然自放乃號其岫曰蕭然山一時名士無不欽慕丹陽尹劉惔嘗曰清風明月輒思元度後終于剡山

齊

江淹字文通考城人少有文名位至金紫光祿大夫後寓居永興今江寺其故宅也

唐

秦系字公緒會稽人有詩名唐天寶間藩鎮舉辟
皆不就隱居北幹山之陽今西倉衙秦君巷是也
羅隱字昭諫杭州新城人有詩名嘗說錢鏐舉兵
討朱溫曰縱無成功亦可退保杭越奈何交臂事
賊爲終古之羞乎唐光啓中鏐表爲錢塘令歷給
事中遷發運使後寓居蕭山卒墓在許賢鄉

徐鴻金華人唐兵部尚書咸通間錢鏐破黃巢於
黃嶺命鴻出鎮其子君綬有武畧襲充長山鎮邊
使因定居焉

宋

羅從彥字仲素南劍人初爲博羅主簿聞楊時得
程氏之學慨然慕之時爲蕭山令從彥徒步往從
見時三日卽汗驚浹背曰不至是幾虛過一生矣
久之卒業學者稱爲豫章先生

韓膺胄字勉夫相州人忠獻公琦之曾孫累仕至
朝請大夫左司員外郎直秘閣知饒州宋高宗時
扈駕南渡致政東還定居蕭山之峽山下兄肖胄

載府誌

來廷紹字繼先河南鄆陵縣人隨宋南渡不忘故
都自號思洛子登宋陳亮榜進士授朝散郎龍圖
閣學士嘉泰二年進階宣奉大夫出知紹興府勅
書有二云紹興乃股肱首郡畿輔重地非碩德重望
不能堪此又云性資簡重學識端純司刑擅明允
之稱典禮著寅清之譽又云敷歷已經乎內外才
猷並著乎兩朝奉公守法之政屢見於施爲體國
恤民之心備陳乎章疏道經蕭山病卒長子遂家
于蕭山之夏孝鄉浙東安撫辛棄疾誌其墓

陸德輿字載之建炎時登第歷官春官中奉大夫
吏部尚書賜爵開國侯賜田三十七頃以蕭山山
川明麗卜居昭明鄉孫守祖登甲第累官至直學
士移居陸家河遂世焉

張賢字哲之江西新淦人嘉定四年解元官至兩
浙廉訪使皆以廉明著民有正直張廉使之號致
仕僑居錢塘後移蕭山子鳳字岐瑞遊魏了翁先
生門學得其要廷臣屢薦不起自號泉石有詩集

及卒秘書監裴益之誌墓子孫世居邑之蘓潭

陳守迎字賓之金華東陽人紹興間知會稽郡有
惠政民甚德之致仕僑處蕭山唐里子孫因世駟

元

戴時才字仲文鄱陽人丰度清雅喜賓客好施與
至正間任兩淮帥府知事退居蕭山湘湖濱徜徉
山水自號南坡老人子正字伯貞性廉慈任山陰
丞陞武康今後授福建行省檢校咸頌其德政云

劉基字伯溫青田人封誠意伯元季避亂居蕭山
嘗館于邑人戴宗魯任榮家遺翰尚存凡邑中山
川景物及名流墨客題咏贈答甚多

高啓字季迪姑蘇人以詩名元季避地蕭山後還
吳仕至戶部侍郎有缶鳴槎軒太史等集行世

高明字則誠永嘉人博學善詩文元季流寓蕭山
與邑人戴宗魯爲莫逆交任原禮延館于家詞翰
猶存世傳樂府琵琶記時在原禮家所編也

王禕字子充元季僑居蕭山與任原禮交最厚後

爲翰待制奉使雲南不屈死贈學士諡忠文
蘇伯衡字平仲金華人流寓蕭山仕至翰林學士
有文集

隱逸

逸民有傳昉于范史魏晉而降代有紀述莫不揚
茲高躅激彼頽風則遠搜近取似難闕軼也蕭地
澄江列岫毓秀棲靈自元度諸公仰止來遊風流
未歇廉頑立懦間起其人雖運會寥廓而孤懷逸
尚奕世同揆矣

晉

夏統字仲御會稽永興人幼孤貧養親以孝聞宗
族勸之仕統勃然作色曰諸君待我乃至此乎自

此不與宗族相見後其母病篤乃詣洛市藥會三
月上巳王公以下並至浮橋士女騎闌車服燭路
統時在船中曝所市藥諸貴人車乘來者如雲統
並不之顧太尉賈充怪而問之統徐答曰會稽夏
仲御也充使問其土地風俗統曰其人循循猶有
大禹之遺風太伯之義讓嚴遵之抗志黃公之高
節充心異之更就船與語其應如響欲使之仕卽
俛而不答充耀以文武鹵簿又使妓女服袿襦炫
金翠繞其船三匝統危坐如故若無所聞充等各
散曰此吳兒是木人石心也統歸會稽竟不知所
終

明

單道字俊良髫時釣於唐家橋有老叟出囊書一
編授之由是機智絕倫明初定圖籍創四柱冊以
上太祖嘉之命頒天下永爲定式今黃冊舊管新
收開除實在卽其製也又憫農夫踏車灌田之勞
別創水車以牛運輪力省功倍天下便之建文初
伏闕上書請保全諸父以篤親親之誼疏入上欲

官之不受永樂初又伏闕陳時務十二事終以緩
建庶人獄爲言忤旨而歸自是絕意世事年七十
餘預知死日至期趺坐而逝諸子爲木龕塋於西
山後邑令劉會題其墓道曰皇明創四柱黃冊式
運水牛車法施天下功存萬世處士單俊良之墓
裔孫無咎別字補齋碩學宏詞爲遠近所宗門下
顯名者至四十七人萬曆中詔舉學行俱優者府
縣以公應詔授儒官非其好也及卒猶子有學爲
行狀最詳 祀鄉賢

張震字溫夫博學善文隱居講學從遊甚衆即朝
廷屢徵不就壽終門人私謚曰貞逸先生

嚴天麟字達夫庠士也宗良知之學潛心講究至
都中教授生徒若楊繼盛李光祖諸先生皆其門
下嚴相嵩延請麟因同姓遂賦歸卜築龍塘舊業
閉戶著書有學庸圖譜六經會通經濟神機等集
寧紹道李阜川題曰尚友錄表其間曰盛世逸賢
張翼飛別號天月疇才岸性父應桂以孝廉歷知
縣肥家有贏資第宅繕麗翼飛棄去渡江遨遊西

湖間丁亥當貢春官避不就以壽卒于家

蔡一鶴孝廉馴謹狷介不妄取予家屢空晏如也
鼎革後家益貧每至絕炊間搗數錢就食旅店邑
侯韓公禮以上賓始終不一私謁竟以壽卒

王鴻烈壬午孝廉高曠豪邁爲詩歌古文詞不拘
繩尺而暗與古今自登賢書不一至公建有執費
以資干謁烈揮之人益高焉予立相事親至孝友
愛庶弟尤至與人交能周其急爲人所難世以是
稱之

曹振龍字木上九歲失恃苦志力學年十四補
一子員二十四歲庚午受知黃石齋先生爲浙江第
一人黃當代名儒也閱其文以永叔目之而振龍
益媿歎學問大進名噪海內歲乙酉後絕意仕進
杜門不出及卒同學私謚曰靖節以追踪晉處士
元亮焉

施是龍字時雨幼穎悟過目卽成誦卓犖有不可
一世之槩年未強仕有司以序貢薦輒棄不赴與
二三知己尚論古人培佳卉品泉石飲酒浩歌終

日不亂雖瓶粟屢空怡如也詩文渾雅足砭纖砌
一習蓋其風韻在竹林間而氣節則近五柳處士
至孝友忠信尤爲世所景仰云
俞之琦字二韓端士也爲諸生每試輒高等言行
循矩雖盛暑必整衣冠望之莫不起敬歲丙戌棄
舉子業志決肥遯遨遊元慶巖洞間三十年不入
城市遠近咸稱隱君子焉同時有韓日嶸者字
岱瞻博極諸書食飭邑序制藝高岸不群詩文峭
俊自成一家其字貞不字亦在歲丙戌時也終日
坐斗室怡情筆硯殆三十七年蓋行誼氣節與琦
相伯仲而似續無人世每惜之

來驥字樂顧避跡江南鐵山遂號烏爲人以忠孝
廉恥自持非富貴名利可奪明季族相國路然公
卜地於其祖墓側力爭不敵驥慨然曰宰相亦讀
一書人耳不克自奮至不保先人七尺土因斷髮閉
關工楷摹庚辰遊泮壬午舉於鄉是年父驚濤公
卒泣血未乾又次年聞變驥嘆曰君父至此烏用
文爲絕意進取衲衣草屨與農爲伍不入城市不

與世事或勸之仕弗處以風水自娛猶遊會稽山水二十餘年疾革時命長男爾繩正席扶坐而逝其始終不亂如此族人私謚爲順毅先生

汪瑛字天晉性至孝幼有奇童稱爲邑庠祭酒以功貢廷試聞闖賊變無復存功名念自號石泉子隱處洛思山闡發性理讀書以啓後學年八十有九以壽終所著有微言指要地理金鑑若干集

包秉德字飲和補諸生第一崇禎末棄去徵爲郎贊軍江上不應隱居棣萼軒閉戶潛修稍暇與

秉衡唱和怡如也歷三十載疾革念尊公猶在勉

起俯伏於簣叩頭而逝其孝友尤若是所著蟲弋

編五十卷

翰林毛奇齡爲之傳

王之鼎字調玉邑諸生也端方尙義其賑卹修圮事難盡述如錢學師孔芳賈令爾壽死無所歸皆殯葬如禮春秋祭祀不替明季楚藩徵之不赴竟以山水自娛壽終於家聞其祖贈君三畏懷大才不樂仕人稱世有潛德焉

卜斯盛字雲生補邑庠孝友誠信蓋天性也工風

蕭山縣志 卷十九
雅更嫺韜畧崇禎末絕意請纓遊三湘兩粵之間
不欲與風塵之客爲伍猶子心衡才猷練達自香
山致仕歸情怡三徑年登上壽其高逸之致與斯
盛一也故世每以二阮方之

國朝

陳基字我白秋官安之裔孫幼好學繩樞甕牖恬
如也連喪怙恃悲哀失明得異人術驗人吉凶靡
不奇中名籍海內然性甘淡泊謂家人曰聲名非
吾願盍歸隱乎遂南旋挽轍載道却而弗顧居家
惠愛親族賑貧廣與惟恐人知殆逸民之流亞歟
子國鼎以恩貢授學博諸子皆庠生

張聖祥字尼謙介直矜氣節重然諾安貧力學文
章德行爲諸生冠學師三舉行優歲乙酉絕意進
取杜門不出訓子姪讀書敦倫明義自號耻庵以
見志然初無感慨狀亦無豪放致莊重古處蓋高
尚而得其正者歟

王之祚字子曆有經濟才丙戌以恩貢貢于鄉時
年正壯決意潛處終日依依膝下與二親娛借諸

季講學友愛無間人每勸其祿養祚曰吾豈以升
斗易菽水簪纓換泉石哉竟卒于家繼妻邢氏淑
真安貧能成夫志後以節終

孝義

余觀傳中所列孝行多卓犖奇節孝本庸德顧安
用奇節爲哉謂之奇節必非人子之幸也然當其
不幸而克以孝著要自爲難操管者又安可不亟
爲哀揚之耶世風而日降矣畧庸表奇用以激勸
頽靡興起至行是亦維風之一節也至乃富而好
行其德人咸賴之稱之曰義不亦宜乎故合而傳
之曰孝義

魏

朱朗字恭明性至孝父爲烏傷長吏所殺朗志
在報讐未幾瀕死往其家刺殺瀕于魂聞其勇雅
爲揚武將軍

晉

夏方宇文正年十四家遭疫癘父母伯叔羣從死
者十三人方夜則號哭晝則負土凡十七年而塋
畢因廬于墓烏獸馴擾其旁吳時拜仁義都尉遷
五官中郎將朝會未嘗乘車行必讓路入晉除高
山令百姓有罪方向之涕泣而不加杖大小莫敢
犯焉

南宋

郭世通生而失母父更娶世通事父及後母甚孝
年十四父又亡居喪過哀家貧傭力以養後母母
亡負土成墳親戚或共賄助微有所受塋畢傭賃
還直仁孝之風被於鄉黨人皆不忍呼其名嘗與
人共於山陰市貨物誤得一千錢追還本主主驚
嘆以半與之世通委之去元嘉四年散騎常侍袁
愉表其至行詔旌其門改所居獨輦里爲孝行里

郭原平字長泰世通子也傭作養親父篤疾彌年
原平未嘗安寢父亡慟絕方蘇躬自營墓喪終不
復御肉又自構祠堂每歲節常哀思不食高陽許
瑤之自建安歸以綿一觔遺之不受瑤之往謂曰
今歲過寒而建安綿好故以奉尊親爾原平乃拜
而受之及母亡毀瘠彌甚旣葬墓前有田數十畝
不屬原平耕者每裸袒褻其墳墓原平輒往哭之
乃竭貲貴買其田農月必束帶以耕宋文帝崩原
平號慟日食麥餅一枚如此五日人曰誰非王臣
何獨如此原平泣曰吾家見異先朝不能報恩私
心感慟爾太守蔡興宗嘗以俸米百斛饋之原平
不受興宗復表其殊行舉爲大學博士會興宗卒
不果 祀鄉賢

唐

許伯會詢十二世孫舉孝廉爲衡陽博士遭父喪
負土成墳不御絮帛不嘗滋味野火將逮塋樹悲
號於天俄而大雨火滅歲旱泉湧廬前靈芝瑞獸
生于墓側 祀鄉賢

戴恭字元敬居母喪廬墓十年芝草嘉禾生其側
俞僅一門四代兄弟十五人老幼八十餘口並貞
廉有經術僅遭親喪哀毀骨立爲鄉里所稱觀家
使孟簡著于圖以勵風俗

按唐孝友傳敘曰唐以孝弟名通朝廷者多閭巷
刺草之民皆得書于史官蕭山李渭許伯會戴恭
俞僅皆事親居喪著行者天子皆旌表門閭賜粟
帛州縣存問復租稅有授以官者今志僅存三人
而李竟湮沒不稱豈
非有幸有不幸哉

宋

孫寶著字天休少孤事母孝母寢疾思食梅及鳩
秋月不可得仰天祈號得青梅于樹鳩自飛墮取
以奉母大觀初行部使者以聞賜進士第任杭衢
二州教授改宣教郎

於琳爲本州防城保甲建炎初陳通叛琳從浙東
安撫討賊戰敗被執賊欲刺面強降之琳罵不屈
賊衆擗射矢着如蝟罵不絕口死之越帥翟汝文
束藁招魂哭而祭之

文曰於戲哀哉杭卒叛命蕩

爲賊臣我昔治師龔行天誅
士衆驕稚懼爲賊屠戰則先遁均爲萑蒲爾獨忠
義奮然長驅鋒摧被執怒叱賊徒脅使必降誓死
不汚昔裂髮指氣象自如羣賊束之爭射其軀矢
如蝟毛嫚罵如初嗚呼哀哉委身就義得死樂趨

生氣如在歿與衆殊瞻彼圍城深愧上大夫痛爾酷
禍慘傷予膚我實負念致爾不辜招魂于官歸安
泉途方能報德哀此字孤魂
兮歸來發此喪車嗚呼哀哉

徐端臣字正卿幼穎悟日記萬言事祖父母以孝
聞歲飢輒出粟平價以濟貧乏創社倉飾學宮濟
病以藥贈死以棺行宣遐邇浙東提舉朱熹行部
至縣特造其閭後以子昉貴恩補登仕郎轉宣義
郎致仕卒年八十三勅贈銀青榮祿大夫寧國郡
公賜觀額慶孝免田壹百畝奉祀

元

金松一安養鄉民至正間以家貧傭工養母凡遇
魚肉必持歸以供母一日母病篤思魚時天大寒
江水亦凍計無所出乃往漁浦渡口籲拜祈天須
臾鴈自西來墮雙鯉于前取以食母病即愈

明

朱訓憲使仲安孫也性惇篤孝友家貧好學不倦
善詩文正統間常于錢清道上拾遺金一裹俟諸
道傍亡金者號哭而至悉還之人咸敬羨所著有

樗軒集

張祓號直叟性誠篤早喪妻終身不娶成化壬辰
歲凶邑宰李鞏踵門請賑祓曰不私其有而與人
同吾志也慨然出銀三百錠粟六百石癸巳又凶
復出粟一千石丁酉河南荒極盡出所積以賑之
巡撫趙題授宣義郎表其閭曰義門子珏字良毓
補邑廩生常佐父發粟賑饑捐銀三萬兩代輸本
邑歲課巡撫劉題旌亦授郎秩大父目盲躬餽之
復明母朱氏被火冒焰出之頭額俱爛父喪哀毀
而卒太博屠瀟題曰承事郎義愍張孝子之墓大

學士商輅爲之傳珏子維翰號幹山克修世德好
施樂與遇貧乏婚嫁則贈之以奩喪葬則助之以
賻遠近至者應之初無懈色建橋五處穿義井十
有六修建儒學凡邑中義舉咸身任焉尤篤學善
文精李篆由諸生立功任揚州指揮使祀鄉賢孫
詞隆慶間發粟賑饑當道交旌曰義門世德

任原禮任長者之孫其高祖寶仕宋京倉副使嘗
拾遺金一囊懸購月餘得其人還之排難解紛爲
鄰里所服原禮襲世德而潤之以詩書與浦江宋

流義烏王禕永嘉高明姑蘇高啓友善皆有詩贈

谷明初徵聘不起人稱隱君焉

原載本志
今增訂

何競字邦直邑庠生父舜賓成化己丑進士爲南
畿御史時秦淮河多爲勢家侵佔舜賓爲清理之
忤權貴坐事戍慶遠後赦歸邑之湘湖有私佔者
舜賓圖復之私者憾焉會當塗鄉魯亦以御史請
令蕭山性鷲悍舜賓嘗與小忤魯啗之憾者因構
于魯詭言舜賓赦歸無驗械送戍所屬解者屏其
飲食侵辱之至餘干夜掩殺于昌國寺又捕競競
官匿蘇州父友王叅政家痛心切齒終夜不寐以
圖復讐久之魯遷山西僉事競潛歸結死士扼之
途眇其雙目執之以送所司具奏于朝兩遣官卽
訊坐魯死以競復父讐可原擬罪徒朝議以唐梁
悅例編戍福寧正德改元赦還閩志記其事卽復
讐編戍云

楊密幼失父事母嚴氏至孝母疾危割股和藥療
之尋愈嘉靖初知縣伍希周奏記巡按以聞詔旌
其門

祀鄉賢祠

來衡字一之成化乙未海溢塘崩捐資修築父爲
義子誣辟公伏闕奏辨獲釋後從東粵遷居泮子
江聞空中呼救孝子忽一杖浮至得憑以濟其杖
至今尚存世傳其孝感云

載學誌

丁應正字東阜入國監以才稱父陽春久病不起
公刲股療之無效乃於元朔夜禱諸神願以身代
父家人莫知也父病痊應正適逝喪殮後出其書
篋得疏稿則爲祈神請代之詞合境嗟異遠近聞
之咸歌頌其事至今呼丁孝子焉

來端蒙號後江由例貢歷判滄州德州有勤敏聲
陞嵩明州同知家居敦睦見義必爲弟端操字龍
巖亦以例貢歷遷東藩經歷嘉靖甲寅殘倭犯縣
里中大怖欲竄去蒙兄弟料族丁壯數百人拒險
而守族賴以全操又築典勝塔以鎮海造文昌精
舍以課族子弟捐腴田五十畝以贍學校貧生備
載各志中操子自周官楚藩長史得贈父如其官
蒙孫夢麟字果符篤實謙和明練世務里中興利
防患之事皆身任之不避艱險凡有大疑率取裁

焉

張維垣字寰宇父德元孝友篤學處約好施歲飢賑濟存活甚多以諸生授儒官壽九十七公勤學好問克嗣父德由貢士歷任羅定州同知壽八十九父子皆爲邑大賓齒德並茂焉

王地字惟寧襁褓失恃卽知悲慟寐中嘗作呼母聲人異之及長乃曰吾不逮養母猶逮養父遂志兼承冬夏晨昏動循古則兄弟析產推肥受瘠大慶感然曰吾一家獨肥坐視一鄉之瘠耶鬻產易米以賑之捐貲建江寺圓通閣爲衆人先授禮部儒士

吳士驂字少愚父文光捐米賑飢至三百石爲按撫特獎公尤好行陰德不務人知除夜有入其室者公贈以金使改行而隱其姓名子孫亦不知也二子長育賢季師賢俱貢士孝友淳篤務施惠已責恂恂退讓百年以來稱世德焉祀鄉賢載耆志徐明徵字晉台性孝友蚤孤父病時思食芟非時不可得後見芟必泣不食舉孝廉乘輿渡江輒曰

此吾父奔走力食道也何忍安車過之耶往往下
車走非公事不見邑宰公車不受折差之贖尤當
時所罕也授慈谿教諭未任而卒戒子孫喪不得
用鼓樂祭不得用浮屠至今遵之子振聲亦以孝
友聞

原載學志

何汝敷字奏言由國子生授光祿署丞公素封性
節約遇任卹則傾囊無咎歲蝗公設捕格以米易
蝗民競趨之不爲灾輸米賑飢全活甚衆北郭蒿
里多暴骨公以私財每歲募人掩骼尤稱厚德

卜仁盛字心寰家貧遊京師三十餘年由掾史官
監軍歸買田宅與弟均析餘及同祖兄弟少者爲
延師教之得補弟子員居鄉務以德化人焚券賑
貧事不勝述歿後子孫漸落術者爲易墓向掘砂
見甕獲金泉焉人皆謂天賜云

徐世英字步瀛素以儒行著母周氏罹篤疾號天
請代割股和藥進之母立差母終負土營墓廬于
墓側開義學以授生徒王侍郎三才爲之贊曰剔
股毀支韓昌黎有鄠人之對然孝子之心何所不

至不得已而籲天請代不得已而割股和藥乃至負土乃至廬墓則割股者所謂嘗鼎一臠而知全鼎之味者也邑令陳侯上其事給扁旌焉

葛盛德由例貢任富順縣丞以廉受獎萬曆末年奢會叛盛德頗有斬獲功天啓二年遇賊長興西關與弟姪六人俱歿于陣卹贈敘州府

任元仕字省初爲邑文學著四書億以教學者事親以孝著濱海多潮患先生建龍神廟爲民祈禱卽今普濟菴也後數十年子雨蛟復加恢治焉雨

蛟子直斐甫十餘歲有土寇圍其家索雨蛟直斐詭譎免其父斐遂遇害令王吉人旌曰孝子

吳應科以吏員授河南武安主簿闖賊圍城應科率民兵戰賊走科逐之賊見兵少回關衆寡不敵死於陣武安民思之立祠肖像以祀之

任三宅號翼寰始吾公長子也爲諸生冠念邑里蕭條核公私耗蠹慨狀有春臺一世之思爲平租庸均里甲直指使動容嘆曰千真萬真一字一淚檄下勒石象魏間若西北兩塘歸正泌湖錢糧條

議明晰雖縉紳無能言亦無敢言者所著有膚言請政江塘事宜鄉兵未議折差款揭垂諸世

徐今禧僉事官之孫貢生震士父也世傳清白禧尤以古處自期壯年失偶矢不復娶謂人曰曾子不再娶以有子元也吾竊附此義庶不覩閔氏之戚耳遂躬搯井臼以養其母必盡其歡人景仰之徐正英性孝友動遵禮度邑患解南糧正英創衆上訴是年俱鮮賠累至修復圯路出粟賑饑邑令旌之舉郡飲賓焉子翼隣以太學生授州同

丁師虞字武彝精敏有幹局講求邑之利弊撰述成書詳析精確鑿鑿可行首義急難凡賑荒掩骼及修葺塘壩祠宇義學前後捐銀米以千計子克振字大聲尤慷慨喜施力成先志凡朝廷有惠政部檄下所司黠吏多持不下克振率先籲請蕭民咸賴其賜先是祖元慶創掩骼塋於蕭然山麓歲久就湮克振爲濬一池因以放生而建浮湘閣于其上卽纍其土培塚俾貧而無以爲塋者得瘞焉師虞庭訓方嚴克振垂老猶長跪白事及卒同人

私謚曰孝正

蔡上驊字伯逸以德行著

順治丁酉御史王公元曦按郡察優行諸邑各以名上而被獎者郡二人公其一也舉其行曰孝曰友曰賑饑曰修學弟士駿亦以優行著人稱二難焉

任元齡字九如入太學有聲父朝諍爲郴州叅軍以桂藩工獲譴有司奉旨逮家屬弟九齡已被逮公時客遠方聞之星馳詣獄曰家有長子是爲家

替願以身代父備受酷刑終無異詞當事者憫之

爲併白其父寃子雲蛟領順治丙戌鄉薦

任師禮有孝行祖母沈病篤刲股和羹進之得愈邑侯王吉人顏其廬曰代親盡道爲上其事臺憲膺旌獎焉

來士宋字寅伯篤于孝義萬曆戊子歲大饑輸粟八百餘石以膳貧院司給扁授之冠帶俱不受人益高之子道昌以邑諸生入南雍文與吳大噪宗人方伯斯行爲之傳

俞在前號敬岳由例貢任福清二尹陞福州府經歷孝友端方守官廉謹家居矢行善事千條如焚券完姻施粥賑饑等類不可枚舉值學宮敝捐貲修葺邑大夫禮請爲鄉大賓卒祀儒學報功祠王紹充號傲韋費序有聲少孤一生衣服未常純米事母至孝尤友于於弟視諸侄同已子焉長子明俊負文名未售終身孺慕年七十母猶在堂膝下歡笑時人方之老萊子徐孝廉明徵作班媯記贈之至還券賑饑轉喪恤病人多感德不忘邑令余禮以上賓曰吾得見善人矣次子明允抱奇才食餼邑庠而孝友總其天性也孫鴻烈登壬午賢書子孫皆敦倫好學加意親戚能世其德云史繼善號晉陵七歲能屬文卓犖不凡知名海內邑中諸利弊輒率先詣當事陳請雅善詩歌古文詞風雨晨夕與張徵士訓懌韓進士日將周文學萬鍾輩倡和泊如也子孟章博學廣聞當道每辟之不就廷栢疏通練達樂義好施皆爲邑庠祭酒至孺慕友恭人無間言故世目公爲陳太丘而以

元季視伯仲也歟

張燧祥字素生屢試未售由例選幕辰州崇禎己巳五寨司缺餉兵譁震驚各郡燧祥毅然請往資銀四萬兩到寨慰諭衆兵悅服各郡賴安陞桂林衛便解組歸里人自高之辛巳歲歛首刲賑濟全活甚多令郝愈上其事旌曰義者鄉邦

國朝

丁師孔字乃願義士丁元慶子也元慶好義樂施捐田助學歿後士大夫高其義請於官入報功祠師孔能踵其行敦風俗喜救卹凡婚嫁喪葬無費者欣然相助值歲饑遠則給米近則施粥所活者萬計家頗饒以施濟告匱然每棲遲湘水間彈琴賦詩泰然自得也教子克揚篤學善文於順治己亥成進士世稱爲善之報焉

丁斯薦字茹升孝友無間經史自耽髫年入泮學憲三院屢旌德行濟病以藥授死以棺築津梁賑困乏不可枚舉邑侯獎舉鄉大賓歿後而人傳頌不衰孫文龍成丙辰進士景龍現授國子學正

周維高字無女舞象補邑弟子員父早亡王母在堂事之無不盡歡母孀居多病每衣不解帶友愛兩弟婚配盡禮因寃心程朱從同宗海門先生遊多所辨晰時稱賞之不置常日擊時事侃侃上陳除積蠹釐宿弊初弗少避焉子國龍登康熙乙卯鄉薦

張迪祥字恒吉明徵士訓懌子幼善病刻苦讀書嚴於實修有長者風常戒子弟曰學母好名好名則工夫不篤故一生最耻爲僞君子凡宗族冠婚

喪祭咸折衷焉晚年侍徵士依依仍嬰兒狀與王太元諸君友善至老敬猶不衰人皆景仰之張氏世稱忠厚先生尤不愧也邑令姚文熊學師盧宜舉賓筵並不列一介賓在席其隆禮如此卒年七十有九

韓日昌字燕克少有孝稱痛父之音容莫覲而母之鞠育維艱也事晨昏供菽水無不竭力婉至焉撫教幼弟卒能成立家貧筆耕門下有寒士輒分館穀以周濟隣族死而無倚者勉助殯殮生平無

片語以欺於人而公庭直等爲偃之室於康熙壬子登鄉薦不數載遽賦玉樓人皆惜之

張文遵貢士訓程公孫也飭躬砥行二十四歲妻亡子僅在襁褓中其妻母欲爲執柯遵曰吾母秉節以撫予予則守義以育子此吾志也遂屏慾終身不娶焉聞先世善翁曾以義夫被旌今遵則克繩祖德者也子大經能孝養卒年六十有七孫曾林立君子蓋謂有天道焉

陸承宏敦義古處藉緡資以盡孝養娶金氏淑慎而能早亡誓不再娶人每勸之承宏曰吾幸有子撫之成立可也又何娶爲教子士奇力學能文餽廩有聲時推舉云

方技

古之治方術者若扁鵲倉公之流皆妙協天機補
禪造化遷固而下史不絕書然則偏長曲藝固亦
道之所不廢也語云小道可觀詎不信哉余故掇
而列之不使一藝之士泯沒後世焉

明

樓英

樓宗望

魏直

王應華

樓英一名公爽字全善性孝嗜學博覽尤精於醫
居元度巖有仙巖文集四卷氣運類註四卷醫學
綱目三十卷行世

樓宗望精醫術永樂間召至京師賜予甚厚
魏直字廷豹能詩以醫聞吳越間治痘疹奇驗著
博愛心鑑行于世凡小兒醫必誦習之
王應華字武橋父仁游學遇高士授以醫術尤精
幼科至應華名大著治多奇驗爲人恂恂仁愛有
古長者風所著醫案子孫秘之以世其業迄今四
方求治者如市焉

蕭山縣志卷十九終

蕭山縣志卷之二十

文林郎知蕭山縣事鄒

勳

重修

邑文學

何文煒

編較

文林郎知蕭山縣事劉

儼

丁夢芝

張崇文重纂

列女

余觀幽閨窮巷之女往往率其天良從容就義或
從一而終不渝其志或之死靡他不淄其守雖烈
丈夫胡以加焉彼析珪曳組無當于人國之緩急
臨大節不能引決者反比比也不幾以珪組爲巾

懶耶余故傳列女厠于賢士大夫之後使觀者有所興感焉

宋

吳翼之母丁氏少喪夫不再行性仁愛年荒分食以貽里中饑餓者鄰里求借未嘗違同里陳攘父母死孤單無親戚丁收養之及長為營婚娶又王禮妻徐荒年客死丁為買棺器自往歛左僑家露四喪無以葬丁為辦塚槨有三調不登者代為送元徽末大雪客旅斷行村里比室饑餓丁自出鹽

米計口分賦長子婦王氏早寡亦執志不嫁詔表其間蠲租稅

王氏女永興概中里人五歲得毒病兩目皆盲性至孝年二十父死臨尸一叫眼皆出血小妹娥舐其血左目即開人稱為孝感

以上皆劉宋時人

元

吳氏桃源吳安叔之女丁京妻也當元季兵亂哨騎四出臨境上吳攜女仁奴倉皇逃避遇兵于塗執而將汚之義不辱厲聲大罵兵殺之又將汚其

女亦不屈復殺之時吳年四十九女年一十八里人聞而異之稱爲雙烈許孝鄉猶存其祠

竇氏吳世澄繼室也至正間世澄爲兩浙運司廣盈庫大使竇氏年二十八止生一子而世澄卒守節不移撫前妻子如已出朝廷旌表其門子準仕至兵部主事卽竇氏所生也

李氏張鯨妻李文定公七世孫女也幼閑姆訓能詩歸于張生四子而寡時年二十二家貧茹荼教子具克成立至正甲午縣尹衛應昂以節上聞兵

亂道梗朝命不下壽八十六子孫衆多鄉里咸曰勤苦之報也

府志作曹氏

王氏西興人楊伯遠妻也性警敏善事夫至正間鹹水溢入田禾盡爛其夫充里正輪差築堰江潮衝突不克就官責其慢日受箠楚王氏痛之割股投水中祝于神沙忽湧起堰成因名曰股堰鄉里

異之堰至今存

邑令尹性碑記畧曰予常讀鄒氏書曰至誠而不動者未之有也若

是乎人有一點誠心天地亦將效靈焉山川亦將改色焉西興鎮楊伯遠里正也值江水衝激堰圯水進田禾之不淹沒者幾何邑人患之謀築其堰底深無以下土水激無以赴工伯遠之日受鞭笞

予不得已也妻王氏痛馬激而割股投水噫愚亦甚矣夫以一塊肉而可止江濤耶然惟痛之甚一若非一塊肉不可以止之也夫何沙漲堰成不踰時而奏功嗟乎誠之感動如是速哉假使王氏轉一念焉必不爲矣昔吳越王錢鏐射潮江上然後以力此以誠未可相較也名曰股堰堰千古存而王氏亦千古矣按明弘治間縣誌曾載此記今復採入

余氏名守元顧應法妻也幼讀書史二十而嫁未五載夫疾革謂守元曰我死子女勿汝能以節義自處乎守元嚙指誓曰君不幸志不他異請以未二年育君胤子成見汝地下也夫卒喪葬一如禮至正三年邑令趙鏡上其事于朝詔表其閭復其家壽八十四在金山蘇太史詩以記之

明

汪氏名嗣貞大義里丁岳妻也年二十八夫卒盡屏華飾簪荆服縞以終身非父母兄弟未嘗得見其面母兄憐其少寡欲諷使自擇見其苦節莫敢發言訛也孤慈比于嚴歲時蘋蘩必誠必敬治紡績恒至夜分家用以饒邑人重其節至今呼爲丁節婦家

魏氏名德盛文靖公子完女也幼有志操頗涉書

史及笄父母擇配得儒士鄭璽贅於家夫還忽遭
暴疾德盛聞之欲往執湯藥祖母與之俱至則夫
已瞑目矣德盛驚殞良久方蘇至夕以帕縊於尸
側祖母解之及歸數欲死家人閑之斷髮爪面嚼
無名指出血不止風中其患處死幼時嘗以父患
劇疾醫藥弗效日夕禱天願以身代父疾竟愈有
司聞于朝旌表其門曰孝烈

徐氏名靖端年十八適毛京京嬰瘵疾死時年十
九傷痛屢絕聞者酸鼻服喪三年親族憐其年少
無出勸之再適則泣而拒之曰禽獸之行豈人道
所爲守節八十餘年冰蘖之操始終不渝成化辛
丑邑令陳瑤上其事

張氏陳曙妻也巳字夫家日貧不能娶父將改字
張曰受陳聘卽陳婦也寧死不願更卽引刀割頂
流血母力奪之得不死後歸陳未幾夫卒哭曰夫
去不久當相見也與姑同寢一夕白姑曰天氣甚
熱宜獨宿姑聽之是夕卽自縊于床距夫亡未三
月也邑令朱栻上其事

可敬陳氏志節

孫氏名淑清字葉棋未幾棋邁篤疾淑清潛製歛具一日方績而棋訃至淑清色變取歛具囑父母納棺中尋自盡時年十七也夫家迎其喪與棋合葬先是鄰有沈氏女許聘汪鑑鑑死哭之慟欲往視歛父母不從將自經乃許泣請父母終三年喪淑清聞之曰誤矣父母問故曰只死方好及歿乃知其自矢云太守浮梁戴公躬臨其家以旌異之洪氏名福貞張惟寬妻也年二十四而寡族人以其年少家貧誤使再嫁洪應之曰如此惟有一死由是莫敢言紡紉不間寒暑以奉舅姑其學操守清苦年八十三卒

沃氏名淑虔王茂妻也年十八歸茂甫四月茂卒服喪過哀母憐其少而無子欲奪其志沃泣不已潛自縊于寢室家人覺而救之得甦躬自紡績孝養舅姑年八旬貞白無玷有司上其事

李氏閩永寧衛指揮李正女晉江訓導徐黼繼室也黼訓晉江娶氏未暮而疾作呼氏曰吾負汝吾負汝氏曰君有前妻子一元在脫不諱吾當扶櫬

還蕭撫汝孤立汝家不汝負也黼遂卒氏度父族將不利于孤盡出其篋告邑令扁藏之而歸其鑰于庫父知其不可奪也乃誘歸別母聚諸姑姊哭挽之不從禁之不得出氏乘間自縊以救獲甦父母乃許送喪至閩浙界當返使其兄與之偕至界氏密呼舟子乘夜潛發歸于蕭擇地塋夫子元方數歲延師訓之至成立已而子死撫其孫孫死又撫其曾孫皆身襁褓之女工晝夜不懈謂所親曰人安逸則邪念易生故勞心苦骨此吾一生所持

今以告汝等補女誠一則也嘉靖十四年詔旌其門邑令蕭敬德立三難傳謂自閩來浙咻謹異音重于去鄉之難生齒尚妙來辰苦多重于立志之難孤兒異出撫如已生單傳再世復撫孤孫重于立後之難邑司訓蔚楷題其廬曰十九執亡夫之節守人所不能守三世撫前婦之孤爲人所不能爲皆實錄也年八十有八天啓時邑令陳振豪復表其里曰貞節里

何氏來志妻年十八適來嘉靖二年九月夫溺於

江何哀慟欲往尋屍沉于江姑揣知之止曰津人
撈之不得汝何往爲氏號泣不已繼以血絕口不
飲食時暴寒尚衣葛姑勸加衣曰夫在江尤寒也
距夫亡六日沐浴更衣縊於床而死邑人義之縣
幕鄒仲和爲詩酌之有錢塘江比曹娥險烈婦名
同孝女香之句

胡氏儒士王渭妻年十九歸渭南半載渭卒胡泣
謂人曰我分卽死賴有遺腹幸得生男當與撫養
否則不敢求生未幾生子坤舅嘔血歿相距七日
家業陵替或勸其易志胡峻拒之曰夫亡舅逝幸
有遺孤吾忍爲一身計不爲王氏計乎勵志愈堅
葬夫育孤抵于成立坤生三子而卒胡率婦守節
以育其孫平居足不履戶外屏去華縟雖遇嫁娶
未嘗服彩年八十餘猶勤紡績邑令施堯臣上其
事

蕭氏生員翁堯妻也歸堯年甫十六逾三歲堯卒
遺一子一女堯臨終謂蕭曰吾父產業盡讓諸昆
家甚貧汝年幼能守志以撫遺孤拓先業吾瞑目

矣蕭號泣以死自誓斷髮垢面日夜紡績以膳舅
姑又訪明師遣其子五倫從學遂登進士第授饒
平宰蕭誠之曰吾一生勤苦以教汝故至此當無
負吾教克繼祖父清白以報朝廷紡績如故時槓
薺搗鹽以給食雖受綸封不改其素治家甚嚴終
始人無間言卒年六十九邑令施堯臣上其事

李氏徐堯卿妻也年二十夫邁危疾晨夕籲天祈
禱弗愈一子在襁褓李哀慟曰我志從夫柰子幼
聊強爲生耳服終父母憐其少欲奪其志嚙指斷
髮以死自誓服素茹淡躬紡績以訓子鄉里稱之
邑令施堯臣上其事

金氏名玉秀西陵來仲康妻也年十九歸仲康十
載而仲康卒強宗逼其改嫁氏嚙臂矢天引繩自
經姑覺得不死時遺孤在襁褓姑老在堂家徒四
壁氏晝夜紡績以養姑哺二孺以底成立一時賢
士大夫爲詩文以美之萬曆十六年令劉會上其
事於巡按御史傅好禮奏聞建坊里門

陳氏儒士丁露妻知師宗州陳殷女也年十七歸

露暮年露卒誓不二適遺腹生一子隨天舅姑欲
其志陳氏泣曰未亡人以舅姑在耳昔誓謂何
乃不諒若是娶居八十餘年至九十九卒嘉靖初
知縣秦鎬表其閭

黃氏名淑貞張誼妻也誼舉進士迎黃之京而誼
已病亟籲天請代卒不起黃時年二十六欲從死
左右以孤孩在苦勸之稍進餽粥扶柩抵家足不
履闕言不妄發事舅姑以孝睦宗黨以禮捐膏沐
謝宴會苦節清操四十年如一日邑令歐陽一敬

其事臺使旌之歲給粟帛從其家

陳氏長巷沈炳秀妻也父邁疾贅秀于家時秀年
十五陳年十四甫四月秀患腹疾死陳號慟欲絕
父母憐其年少欲令改適使婢持百花綺裙示之
揮去不顧曰此何爲者年二十一富人倩一達者
爲媒父爲治具陳問故叔母以告陳慟哭且罵曰
禽獸之言何入吾耳卽持溷水濺媒氏衣媒遑遽
走由是辭父母歸夫家立夫之兄子爲嗣母子相
守熒然一室人罕覩其面惟寒食展墓偕妯娌一

往哭必盡哀聞者垂涕以是終焉

徐氏名清源儒士周大器妻也年十九歸大器七

年而夫亡哭踊不食幾絕者再其母故餓其兒啼

於前乃甦抱兒泣曰吾為夫骨肉延一日耳墓營

並墮以示不二蓬垢蔬敝苦鞠遺孤手寫夫像懸

于其室時當既望因題其像曰此月有時缺此每

事必泣告諱日哭奠盡哀凡遇婚嫁慶賀必痛其

夫不見淚潛潛下宗人咸為感泣後子長家業漸

隆為母壽輒恚且泣曰吾意無息不與爾父俱何

壽為寢不解衣足不踰閫節兒女燕見未嘗少假

言笑霜操凜然年六十三卒臨終自題其像云黃

儻然愧本心至今稱周節婦云撫按九旌其門元孫之

麟官翰林院編修

瞿氏庠生瞿京女年十七歸儒士丁令金金患痼

疾時怒擊人家人多避匿氏獨侍夫遭筆楚至傷

肢碎首母念氏險楚諭氏歸寧獲保生氏泣謝不

從踰三十載撫子紹曾輩成立鄉族嘖嘖稱賢云

徐氏傳承寵之妻俞氏傳承宸之妻也承寵未娶

得癘疾徐父欲悔之氏不從卒歸傳寵癘益甚氏
調護曲盡至六載寵竟卒承宸方娶而病瘵距六
月卒二氏爲妯娌守節並篤俞氏之父憐女少欲
奪之氏持刀斷髮又自刃頻死父乃止徐氏有子
德新俞氏通經史同提誨之邑令楊維喬爲作雙
節傳上其事撫按屢旌其閭

丁氏名庚父龍溪丞少字黃承元江夏知縣世厚
幼子也將嫁承元卒氏悲痛欲往視殮其父止之
氏以死請乃往至喪所撫屍號慟截髮納棺中旣
歛遂加笄持斬衰服如婦禮自此不復歸父家踰
數載猶子可侗生立爲嗣氏幼聰慧能詩文至是
不復措意動止肅若嚴吏家人皆畏憚之年三十
三卒邑人稱之曰節女後十餘年有蔡貞女行亦
相類其夫會稽人

任氏王廷相妻進士辰旦祖姑也廷相早世子方
彌月厲志冰霜毀容去飾操作勤苦不苟言笑子
孫如戚對之凜如也一日親往汲水有族貴人來
其僕不知爲主婦也誤呼廷相名不答歸撫遺孤

哀慟幾絕以夫名爲人所指斥勉其子以篤學成名克昌厥後其孫先吉登康熙庚戌進士先采已西舉人甲第蟬聯酌其宿志焉壽至七十三卒人稱爲莊節

魏氏文靖公元孫女也夫徐鳳梧遊蕩客死氏年二十惟一子奉姑以居晝夜辟纒易粟以活子復被人畧賣瑩處一室突常無烟雪夜以草薦自覆或勸之改適至以勢惕之氏曰人患不能死爾何畏人爲且我必不以窮餓故辱我祖及我夫之祖也蓋夫祖卽廣西僉事諱官以清白著聲者也後子長得脫歸漁釣爲業以養母焉

錢氏山陰人方逢泰聘爲繼室泰素病羸父母欲負盟氏斷髮自誓乃止十九歲歸方泰病日甚時舅謁選京邸氏同泰往至京而卒氏哭泣不食九日亦死禮部御史臺具題 詔賜祠坊并郵送雙柩歸事在萬曆四十五年

孫氏包曾義妻義買京師而卒氏年二十六誓酬夫志晝夜勤劬養姑字幼姑二喪殯盡禮邑令上

其事歲給粟帛

盛氏年十六適單之祥祥病瘳日夜籲夫請代表不解帶者歲餘祥歿從死姑勸乃止孤幃茹荼循繩蹈矩凡四十餘年如一日邑侯楊維喬上其事撫按旌之歲給粟帛

張氏同胞三俊誼試誦之女兄讀書知古訓歸庠生王宗岱六載而岱歿二子紹充紹冕皆在孩提氏辛苦備嘗訓子讀書充爲文學有聲冕仕至苑馬寺副孫明允曾孫鴻業鴻烈皆舉明經孝廉元孫婦徐氏胡氏亦以節著焉

張氏儒士陳夢蘭妻也歸陳生一子而夢蘭歿年十八育孤守節十載不歸寧奩產盡鬻以歸舅姑示終身無易志也衰麻不暫脫老年有饋果餌者必呼子孫共食無少長咸均霑之以是訓其子孫泰昌時邑侯劉安行特加旌獎年距九十卒

甄氏西興人年十六歸王命正宦族而貧氏鬻產供舅姑具夫族稱孝命正卒遺孤甫十月家益窘氏勤十指以養預爲舅姑殮具備艱苦四十餘年

冰檠凜然孤之股抱雋才有聲諸生間邑令學諭
共上其事學使者判云戴氏早失所天願從於地
將劓鼻以矢志爰銘心而存孤益實錄也

蔡氏生員吳馴妻及笄歸吳逾五載馴沒哀毀絕
粒舅姑以撫孤諭之勉進饘粥夫葬卽穿壙其旁
善事繼姑毀容敝服節孝並著臺使給獎之

張氏儒士徐世道妻也事舅姑以孝聞年二十七
世道病篤以養姑撫子爲囑氏泣遵命旣沒不復
茹葷衣白布懸像于室每飯必享每事必告凡五十

餘年悲感若初喪時姑嘗病氏禱天願以身代夜
夢神語之曰非爾肉無以救爾姑氏驚起剖股作
糜以進姑病痊里人異之上其事于有司乃旌焉
氏苦節且孝庭訓有方季子宗思亦以孝著諸孫
奇英壽明景英皆有聲黌序年八十一卒

黃氏庠生何之杞繼室守節三十年後五十餘年
邑人上其事曰氏年十六而適何距十載而夫歿
中郎有女難爲緩急之人信道無見僅得螟蛉之
子子方娶婦不幸兩亡女已于歸未幾雙天末年

復立猶子文燿爲嗣雖麥杯之奠尚有其人而荼
苦之合殊難爲繼似茲貞淑足儷前修邑侯鄒公
詳核入志

黃氏應天府檢校王延祚妻也檢校于崇禎季年
奉京兆檄輦貢物抵夏津縣兵陷夏津夫婦皆被
執一卒擊檢校垂斃氏誑卒曰釋此我有財寶在
近寓可取也羣卒卽釋檢校操南語與氏抵寓氏
度夫已脫去乃嘆曰我死矣他卒先入寓舍者以
火灼主婦甚慘因以脅氏氏極詈之遂被刺死後
四年氏子今高城守臨清其婦亦黃氏也城陷赴
井死錢宗伯謙益爲作姑媳雙烈傳

徐氏青州府判希龍之也適庠生張芳春二十三
歲芳春歿無子上有孀姑氏孝養備至凡五十餘
年姑乃卒撫繼子如已出繼子弘道亦盡孝母子
拮据成家時推所有以調里族歲荒傾家賑濟至
困乏不自恤邑令羅公異而旌之後弘道歿氏撫
二孫長孫歿又撫二曾孫耄年不廢紡績壽至九
十六

來氏庠生黃方妻黃茂長母也年二十四寡居茂
長時四歲氏守節垂三十載以禮法爲中外所推
禎朝大學士宗道其從祖也內儀貞操無愧望族
焉通庠特上其事

周氏太學生張孫祥妻二十五歲而寡守節距四
十年弘光時邑侯蔣星煒以孝節給扁旌之

周邦儒妻張氏適周逾歲邦儒病歿氏年十八子
一新方就乳氏卜事舅姑下育孤胤守節凡四十
年萬曆乙未歲嘗道給扁旌

撫州知府張試之側室陳氏年十八試卒任所慟
哭數絕亡何以遺腹恨不獲相從地下扶柩歸里
足不履戶外越二月生一子茹荼苦守撫遺成立
撫院旌獎歲給粟帛

鄭氏洪緒妻也于歸數年舅早喪夫隨逝姑兩目
盲曲盡孝養子勲方在襁褓訓成弟子員教諭張
申詳學憲孫巡按徐給獎事與王命正妻戴氏吳
馴妻同一案也詳學志

施氏太學生沈聖基之繼妻二十四歲守寡遺腹

三月生子發家貧勤劬撫教壽踰古稀

一亮妻史氏十九歲亮故暑不下樓寒不解衣
養殮每多不繼而志撻益篤課子士驄等成人踰
五十年壽終邑令劉一漚以節厲清霜旌之

韓氏夫張弘思住西河貞節里家素溫氏奉舅姑
曲盡禮意舅姑沒夫日事蕩游竟至窮甚先嚮其
子後計其妻氏僅三旬聞而泣日子可嚮妻不可
嚮焉有婦人事二姓者乎夫方與人議嫁禮而氏
已投繯矣隣里咸悲嘆之曰貞節里中貞節婦信哉

周氏任立政妻年十七而寡家貧無子氏孝養舅
姑無遺力守節五十餘年以壽終

戴氏庠生徐中孚妻也寡居二十餘年鄰人被火
延且至其族黨強之出氏不從遂焚死署縣辜羅
侯明祖扁其廬曰以貞爲行

韓氏其夫以貿腐爲業耽酒好博醉輒毆婦無怨
辭竟以負博嚮其妻屆期遣之氏潔服自經於房
而死事在崇禎末年

順治四年王師渡江趨婺州武林上兵乘間四掠

有趙逢元妻張氏聞變預紉裏衣抱幼子赴湘湖
死王九龍妻戴氏亦赴湘湖死庠生胡光樞妻徐
氏爲亂兵所執奪刀自剄死貢士來逢時母王氏
聞變自縊於張家村楊梅樹庠生來冠朝妻何氏
儒士來逢盛妻黃氏來冠倫母俞氏妻任氏太學
生沈驥妻來氏相約以死抽筭贈土人令導至水
深處至長興鄉湯家井俱投水死庠生來夢麟妾
程氏被獲赴白馬湖死韓時雍妻來氏年二十寡
居逾二十載倉猝遇兵猝之使行前值深湟得間

躍入以死庠生黃奇英妻於氏赴水死庠生來裕
之女與婢小春俱死于水庠生楊守程妻湯氏度
不得免與守程并一子俱抱石投去虎村池水死
徐喬椿妻沈氏爲兵所逼乘間自縊于龍山嶺翁
氏二女長女年十六許適汪生幼女十四未字兵
至鳳儀鄉二女被獲置馬上經株墅渡橋長女跳
水中幼女從之俱死王國幹妻俞氏爲兵所執囑
其夫速避去遂獨行抗詈不撓被斃斬死其地在
西興鎮王國生之妻徐氏見兵氛甚急以幼子付

國生卽赴水死其地在傅家峙石池庠生傅日新妻戴氏見兵至投橫山寺前池死之以上皆臨難遑遽而能以義自裁不肯伴生君子蓋有取焉故附志於明末然蕭邑當時四面皆兵婦女不屈而死者甚多今但記於見聞所及儘有遺漏以俟後之稽補云

國朝

來氏何之棟妻也棟遊學入京長子數歲次子在姪棟卒于京邸獨持門戶上奉翁姑下撫二子辛

苦萬狀晝夜悲淚遂成目疾家漸貧訓子益嚴次子文炳中武科授山西潞澤營守備

丁氏夫趙應榜元邑簿誠之裔孫也生三子而應榜逝貧無遺貲氏以絀織爲活備極艱苦教子方嚴如父道三子皆謙恭儉克遵母訓長之鼎領武解季之鼎以貢候選諸婦皆令躬親井臼至耄年猶率先不怠焉順治丙申撫軍廉其實上聞

俞肯特旌建坊曰賢節以孫文壁封太淑人

童氏處士周萬紀繼室也歸周五載處士病篤氏

壽夭請代割股以療不愈一子維則方襁褓處士

臨歿時數視暝氏悲仆欲絕亦數視維則乃止家

貧以勤苦佐食一子二女婚嫁有節備歷諸艱貞

操愈勵後子遊庠處士祖母徐先以貞節膺獎世

稱周節婦焉氏克嗣音一時賢士大太多為詩文

以詠其事浙閩總督趙公廷臣獎之部院劉公撫

院范公具題康熙九年奉

旨給銀建坊里門

吏部左侍郎海豐王詩西山之麓湘水濱芳風襲襲生幽人蕙蘭

秉質性霜雪焚膏佐晷甘食貧昊天不弔鸞膠折

誰說手抱遺孩纔弱齡孤燈祇有影憐形恩

績謀朝夕贏得瀟瀟髮數星青閨聲動採風使表

揚不靳幽潛事何幸征人獲與聞樵來傳記為題

誌密密同雲雪欲飛烏啼中夜是耶非栢舟自似

為君詠彤管何愁不嗣徽督部右堂關中周之桂

題虞江翻雪浪崢嶸嶺肅清風表表越州女英英江

水東驅馳西陵道瞻望北原松捧傳心先切開篇

燭半紅春殘飛絲燕夜永泣孤鴻惟節能兼孝因

貞可教忠堅誠常隨指淚血欲枯腫五載藁砧念

三遷蛾術工心甘茶比薺節苦膽丸熊霜氣圍中

也才而嫁女也各得其所其間艱難拮据與夫富貴通塞風雨晦明境異情殊變錯于前而孺人之節愈純愈勵而愈不可移迨節成議定問用稱之鄉之先生學士歌詠之令是邑者望而拜之臺使者重臣以粟帛歲遺而旌異之人咸爲孺人榮而孺人視之無與也惟知畢夫子之事成夫子之志以求從夫子于九原者固四十餘年如一日也若而人者非所謂義本乎性而氣充乎身者耶勸也忝爲茲邑長讀其傳賡其聲詩竊敬慕而登堦以拜焉風規芳範思見於古而且見于今思見于遠而且見于咫尺之間異日者採風登之太史傳之婉美先烈風示來茲蔑有紀極將見風俗田而益醇人心由而益正倫紀由而益敦以斯世之則非僅周氏族人之幸而茲蕭邑人之幸也且不可不爲闡邑人之幸而長是蕭邑者之幸也且不可不爲闡揚以勒之邑誌

黃氏黃州知府可師孫女庠生何之楠妻也六載

而之楠歿無子繼子又早喪墓舅姑躬任拮据家世華腴獨甘淡泊事上接下禮法肅然凡三十餘年總督趙廉其賞給扁旌獎康熙九年奉

勅建坊里門

蔡氏儒士賀國祚妻貢生昌圖母也年十八適賀生昌圖七日夫病篤聞兒啼強起視之旋瞑家貧有婆姑氏躬操作以奉菽水訓昌圖舉明經方授官而歿氏又撫五孫俱成立業儒苦節垂五十載

撫院范具題康熙十二年奉

勅建坊里門

來氏儒士周應明妻嫁二載夫病八載夫死遺孤
夢熊在襁褓應明臨終囑曰汝當以不死之身完
我未了之事氏嚙指受命家計日窘翁復久病氏
生供甘旨死營歛葬備極艱辛訓子夢熊如嚴師
子長有聲於庠邑侯蔣星煒申憲旌曰完節

陸氏歸儒士葛堯勳七日而勳病姑視子疾與媳
參處距三月而勳死八年十九父母憐其年少欲
奪之氏曰我命然也一從執婦道尤謹嘗語人曰
吾於舅姑微獨婦也一死者完子道耳生平言貌
端恪去母家最邇無故不輕往也以節孝著凡三
十餘年順治六年邑侯王吉人給扁旌獎

葛氏沈三台妻年十八夫死懷妊數月哀慟欲絕
旣而曰此非吾死之日乃起治喪及期舉子之鳳
毀容苦守及子長娶婦夫諱日設時薦語子曰吾
事畢矣一哭而仆就床旬日而卒之鳳後任泰和
縣簿署縣事卒于官

單氏年十六適孫應訓十年訓卒氏力作奉姑訓
子以禮邑進士來集之爲讚曰守夫之節非難而

完夫未完之志爲難無子以長非難而訓子義方以成爲難東阡西陌之經營多出自十指針紉之餘左宜右有之應酬皆發於寸心義理之正苦而若甘者口中之藟莢而益茂者階下之蘭若孫母者巾幗而儒冠者也年七十邑侯鄒按其事以待旌

韓氏岸生來孫芝之母年二十二夫歿氏奉婆姑撫嗣子不遑朝夕子夭又撫其孫賢至成立官吳江縣巡_以假里黨爲列其事于縣以待旌

徐氏岸生於奇玉妻年二十五奇玉歿無子氏上奉衰姑晨昏省視姑忘其無子也距十年姑卒撫繼子始黃恩勤教誨一如已出邑侯鄒核實待詳待旌

黃氏明經黃三策孫女廣文徐希穀子婦兩姓皆望族姑施孺人以孝行著載學志氏歸徐數載而夫一曾卒于官舍年僅二十貞志不渝凡五十餘載

徐氏太學生任元齡妻事舅姑以孝著舅朝諍仕

爲衡陽佐元齡侍父在官氏有二子雲蛟雷蛟皆躬教之朝諍以藩工獲譴有司逮之急時元齡未歸氏挺身就逮神色不改久之事得解氏孝愈著雲蛟後舉孝廉雷蛟髫年入邑庠蚤卒妻史氏僅二十一歲無子善事老姑衣食素齋清操無玷族里稱之

來氏儒生蔡文治妻歸蔡二載而文治歿家貧無子服除就食母家媒妁瞞者盈門氏大詈之遂還夫家盡鬻衣珥以營夫葬長齋禮佛未嘗足履戶外也後瞽一目復損一足煢煢三十年邑侯鄒公以諸生請登志

倪氏寶豐縣典史黃岳齡妻歸黃數月岳齡卽營辦入京生一子後岳齡卒於任所氏聞訃哀號求死族親競勸之乃忍死撫孤凡三十餘年清操不渝通庠上其事

徐氏長山農民富時異妻年十八歸于富甫四十日夫死將葬氏乞于姑營雙穴不允遂自經于墓側邑士大夫矜之鳴其事于縣憲時順治十七年

也

蔡氏黃化龍妻化龍既娶以痘亡氏年十九矢志靡他上事舅姑下撫孤胤連值兵祲艱辛萬狀姑登九旬氏亦垂白朝夕奉養必躬必誠鄉里稱之曰孝節

華氏施懷榮妻懷榮蚤歿氏節操完潔育二子三女子成家女得所歸焉

蔡氏孝廉蔡一鵠女庠生任士進妻也一鵠行方正爲一邑所欽氏幼承家教既嫁執婦道甚恭未

十載而士進歿守節三十年內肅外雍族黨重之孫氏禮部儒士盛鳳鳴妻庠生之標母也年二十五而夫亡含荼訓子苦節垂五十載順治十五年通庠列其狀邑令黃應膏學訓周嗣愷給扁旌之王氏周應舉妻也年二十五而寡苦志守節紡績撫孤辛勤嚴厲七十餘年如一日子玉爲諸生冠觀察龔如錫給扁額旌表題曰撫孤守節云

張上甲妻朱氏端靜嫺雅姑單氏處家以禮朱事之惟謹夫亡矢志矢水霜撫幼女繼子備嘗辛苦其

兄甫亭曰汝能守乎正合吾意遂延以歸朝夕取
給焉歷五十年以壽終臬司王廉其事旌曰節
比松筠其女歸朱日高早亡張氏盟心匪右堅守
不移事公姑婉順惟虔撫子女義方是訓其母朱
氏之生養死葬獨任無吝色邑人咸稱母子雙節
云

韓氏張邁妻也年二十五邁故奉舅姑至孝處妯
娒惟和針指紡績撫孤成立世有孀婦入寺庵焚
香禮佛而韓足不出門外不聞其聲三十餘年猶

如一卽邁從弟文進娶陸氏鄉賓應球女夫貧甚
陸守節育孤貞操無異於韓而每有諸叔之醜悍
其苦更甚於韓也卒以節終

翁大捷妻王氏年十七于歸閨三月而大捷走燕
甫三年而大捷身死安貧守節經二十載家益貧
節益堅隣有勸其再適者拒不與言康熙壬戌夫
柩歸里撫棺哭曰吾不敢自盡者因汝柩未歸耳
今而後死可同穴矣遂於七月二十三日夜分縫
聯衣履哭別先靈赴水而死

華氏生員王洪妻也。夫亡持節守義。妻張氏對天斷指誓無二心。教婦道孝成於教。訓義方慈比於嚴。處富貴家尤克勤儉。紡績每至夜半。蠶桑數倍民間。蓋有郝鍾之禮法。而檀敬姜之賢德者。子芝穎爲諸生。更能恪遵母教。邑令屢旌其門。

蔡氏生員王基之妻。貞靜幽閒。二十四歲基亡。撫幼女嬰兒。備嘗辛苦。蓋其節有足多者。

徐世薦妻楊氏。性專靜。能綜家政。二十五歲世薦沒。子女皆幼。氏哀痛數死。曰：吾不敢從汝於地下。

者以此孤兒稚女耳。家業僅堪供饘粥。而外人常覬覦。勤針指。搯井臼。絕腥羶。曲撫育而靜外。擾實人所難。邑令姚文熊旌曰：冰霜勁節。

陸一龍妻沈氏。年二十孀居。撫孤子成立。教諸孫義方。居室則道齊師氏制行。則德配母儀。此得守節之正軌者。壽七十九。孫仕超等鬻序有聲。會元繞膝。獲報之隆。蓋未艾也。

沈氏年十六歸王長祚。生子公望。祚卒誓不再適。子娶徐氏。生子懋官。而公望亦卒。婦姑相守皎若

水潭霽月今沈壽八旬餘年六十邑令姚旌曰雙節

王承乾妻李氏年二十七而寡勵志秉節存孤治家咸軌禮法內外曾無間言

蔡氏許同寅之妻年十九寅卒爲亡夫供子職菽水承歡撫季叔若孤兒恩勤罔懈若存弱息極備艱辛通學特上其事

來氏王承式妻也二十六歲而寡舅姑性嚴峻事之極謹遺孤七歲擇師訓誨平居織紉惟勤恪遵內則族里稱其節孝

戴萬象妻來氏早寡家貧茹苦經營撫二女一子以完節終諸生張崇文等上其事令聶世棠旌之傅氏名以敬適蔡士翹十九而寡姑亦早孀旣鮮伯叔又無子女事姑孝晝則相依夜必陪寢語言不苟行止有常雖兄弟亦不同席歷五十年無或少渝聞其祖母徐氏以雙節受旌氏克繼徽音者也諸縉紳多爲傳其節云

魏氏儒士張堯仁妻年二十五夫亡子師賢方四

齡堅志守節撫孤成立師賢娶李氏二十歲而卒
子僅在襁褓李事姑育子孝慈備至邑令徐則敏
姚文熊屢旌其閭

來氏生員單匡周妻也早寡孝事舅姑慈撫遺孤
綜理家政巨細畢周遇姻族吉凶尤能接以禮施
以惠焉子彝國禮補邑諸生

任氏十八歲適朱大棟越十一年棟亡家貧惟事
紡績有勸以他適者嚙血而誓終身屏去膏沐教
三子以德義靡間今年八十康寧無恙子兆鱣等

能孝事焉

童氏任五仁妻也二十歲夫亡立志守節盡瘁撫
遺事翁姑咸極孝養姑久疾晝備湯藥夜同寢臥
二十餘年如一日年六十一先姑而卒但以不能
事姑百年長號哭別親黨聞之無不流淚私謚曰
貞愍

朱氏王之麟妻也年二十夫亡勵志冰霜毀容去
飾晝夜勤劬以佐家計舅姑年邁痛子過甚氏能
婉承孝養撫孤成人彬彬循禮鄉黨推其節孝擬

詳待旌云

王氏郡庠生何愈高之妻年二十二愈高外遊而
亡克盡婦道足不踰闕外不聞其聲水撻始終無
玷

朱氏邵武節推彩之元孫女歸陳繼魁魁授守備
卒於官訃至氏幾不欲生悲哀骨立不茹暈衣帛
艱苦異常課子成立皆孝養其母焉

蔡氏韓麟之妻也年甫二旬遽賦黃鵠事舅姑教
子孝慈兼至諸生韓日祥等上其事邑令姚文

熊旌焉

來氏蔡國柱之妻早寡撫育遺孤辛苦備至茹荼
守節維繼克勤益有懿德而堅冰操者也邑令姚
文熊旌其門

倪潤妻金氏年二十九潤故氏曰聞婦從一不聞
二適使倪氏赤貧猶欲爲匹人苦守况薄田亦足
瞻饘粥吾志矢靡他也每日課僕出隴上卽治絲
泉理機杼無須吏輟婦業孝事翁姑慈撫孤子內
外初無間言

張全甲妻也事姑以孝相夫以禮姑病劇禱

天割股作湯服之漸愈後姑老臥床與全甲奉事

晝夜不解衣帶者數年邑令何璉旌曰淑孝

金氏孝廉魯良禛妻也甲辰禛赴春闈卒于京上

無舅姑下鮮子姪依母兄守寡藉奩產資生數年

母兄繼逝嫂欲歸曰奪志氏曰吾志不改何忍使

魯氏鬼餒也撥田數畝為公祀產而苦守愈堅實

有禪風化者歟

里仁閭秀王氏行肅二女不字不脩容不

妄笑不無故出入依弟肅六以壽終女孫名戒者

諸生廷樞女性至孝歸井亭徐夢旦數年且卒無

出誓不二志歷挫折操守益堅聞父讀左史至祭

仲殺壻事有人盡夫也之句戒曰此語狂悖不可

為訓真明理義具丈夫識高于世人遠矣竟完節

終

郎氏蔡良祐妻也年二十二歲祐亾子在襁褓氏

曰吾分應死但有遺孤宜撫成立為亾人爭氣遂

屏棄簪珥勤儉治家義方教子歷四十餘年貞操

凜然紹節推王陞旌曰持行米王子安仁癸卯舉
人任臨清衛以

覃恩贈太宜人

趙氏蔡君球之妻年十七球死誓不二志足不踰
閩聲不聞外至其事姑撫子尤爲鄉黨所重

楊氏生員單彛妻年十六于歸歷十載彛病籲天
請代及卒哀毀骨立理家事克勤處親族有禮衣
素茹齋清操終始無玷

陳氏生員鄭龍章妻也自笄失配孝姑嫜和妯娌

持家訓子勤儉有禮冰霜節操足爲婦範通學上
其事按察司金維藩旌曰四德完貞

周氏年十七適金玉鳳二十二歲鳳故氏曰未
人爲極難耳奈垂白在堂遺孤在膝責誰任之志
矢栢舟閱五十九載孝慈貞節爲鄉里所欽重子
鼎黃邑諸生

王氏生員蔡恂妻幽閒莊重二十五歲恂亡見幼
翁始哀悼病篤氏曰因吾夫之亡而傷姑舅之生
重貽泉下憂也外倩親族購良醫內調湯藥治中

饋時復以寬語安慰舅曰有媳若此子死猶生至其撫幼叔鞠孤兒辛苦尤為備至子文侯為邑諸生

陳氏仁化知縣陳之晉女適安行順治初安行隨晉蒞任卒於署氏年二十七歲矢志柏舟事姑撫子備嘗艱苦處妯娌又和婉有禮年逾六旬子孫繞膝督學使張衡以節孝旌閭

蕭山縣誌卷二十一

文林郎知蕭山縣事鄒勳
何文煒
文林郎知蕭山縣事劉儼
重修 邑文學
丁夢芝 編較

張崇文重纂

序誌

徵實傳遠典籍是憑禹貢九州周官職方雖沿革代殊質文屢變而疆域莫紊風俗依然由此言之紀載之功不可泯也越固荒服而越絕一書為郡邑志之祖則彈丸茲蕭界于吳越古今遺蹟見之經史者亦

纂述之所必資也至于昔人水利諸書用意于民良厚亦併志之俾後之有事于斯志者得取衷焉

越絕書記地一卷所載固陵防塢杭塢等地皆屬餘暨其載越石買爲將致敗在浙江亦餘暨地也其書或云子貢作或云子胥作後人詳其義謂漢袁康官越時所作而文詞則郡人吳平屬定之似爲有據武備志載越伐吳吳軍江北越軍江南以江爲浙江似未精考蓋句踐之地西至禦兒卽今嘉興地吳伐越戰於越地爲浙江越伐吳戰於吳地爲吳江春秋

云越子伐吳吳子禦之笠澤夾水而陳笠澤蓋吳之松陵江也當訂之邑志止載本邑舊蹟故獨詳石買事

水經注酈道元著內漸江一條漸江卽浙江所載孫策攻太守王朗事與通鑑有互通鑑云朗拒策于固陵策弟靜曰朗負阻城守難可猝拔查瀆南去此數十里道之要徑也宜于彼據其內所謂攻其無備出其不意也則查瀆在固陵之南乃錢江上流也而又水經注云浙江逕固陵城北又東逕祖塘謂之祖瀆

蕭山縣志 卷三十三
二
孫策攻王朗於此則祖瀆在固陵東北乃錢江下流
矣瀆名少異而地勢懸絕注又云浙江東合浦陽江
浦陽江東北逕永興東與浙江合今邑城之東如龕
山等處皆有浦陽江入浙江舊蹟而內皆有塘越絕
曰石塘越所害軍船也防塢越所以遏吳軍也皆去
縣四十里則此地自古爲道之要徑舟師從此徑衝
郡城或分兵向固陵使腹背受擊所云據其內出其
不意者也祖塘祖瀆疑當在此又孫策從祖瀆襲高
遷屯吳志曰孫策入郡郡人迎於高遷十道志曰重

見孫權于此前于武備志疑高遷屯在長山鄉
屯里今邑城北五里由化鄉有高遷橋如謂祖瀆在
固陵東北則疑高遷屯又當近此世遠無稽不可臆
斷聊記於此以俟博雅者

蕭山縣水利事蹟錢塘顧沖著沖以宋淳熙九年宰
蕭山具載六湖二堰鄭河口事蹟爲一冊垂於後又
作瀟湖水利約束刻石樹于縣庭

瀟湖水利圖張懋著懋以明洪武初宰蕭山繪圖刻
石又作瀟湖志畧具載顧郭楊趙四公創經始末

蕭山水利事述本邑魏文靖公驥著公以尚書致仕家居凡邑水利興廢之由利害之係塘閘壩堰共十六所勒爲成書授門人監察御史何舜賓舜賓遵師命清理湘湖忤邑令鄒魯被陷死其子競復讐事載孝義傳中舜賓婿福建副使富珙以此書併事蹟等書及禁革湘湖榜例皆刊板至今尚存

蕭山邑志嘉靖癸卯志自永樂二十年後志凡五易是書屬田公惟祐訂本而分屬張公燭錢公穀纂成之者也田公以解元成進士歷任潯州知府其領鄉

薦時卽有邑志私本弘治間志取裁焉後三十餘年公致仕家居復出訂本乃成斯志張公以進士任刑部郎錢公亦貢士以詩畫名一時邑稱善書者宋張卽之而畫則穀與御史鄒應龍交其疏劾嚴嵩父子實穀所草也萬曆己丑重修邑志爲張子諒戴子文明蔡子 續諒歲貢終府教授

蕭山學志明萬曆時教諭王公學孝著天啓時教諭張公汝醇修之邑人何子汝尹助之梓焉二公皆入名宦傳汝尹字克言以序貢授台州府教授其行誼

遺文

蕭山縣科甲題名記

欽惟聖朝取人之目不一而惟科甲為至重是何也蓋英俊之

士遊學庠校者本之以智仁聖義中和以植其德敦之以孝友睦姻任恤以篤其行博之以禮樂射御書數以弘其義凡此皆六經聖賢垂教後世之明訓也六經以還自漢晉宋唐歷代治亂興衰之跡與夫公將相牧守政治之賢否得失備載諸史皆可考見學者於此稽之於經以明其體參之於史以適其用雖前代有賢良孝弟博學宏詞等科皆不外乎是矣而法律刑名簿書期會不足道也此科甲所以重於他科有由然哉我國家自洪武永樂以迄于今九十餘年賢才之出東南者紹興居多而蕭山尤彬彬然也蓋蕭山為紹興名邑襟江帶海又有臥龍會稽秦皇諸山環抱于其前乾坤清淑之氣盤礴鬱積鍾其秀於山水山水之秀又會聚英華鍾其靈于賢才鍾山水之英華蒙朝廷之化育故出而拜黃甲擢御史

仙大卿職藩臬之長貳與郡縣守令庠校文學之官
布列中外其碩德雅望英聲偉烈表表在人耳目者
前後相望也何其盛哉夫士之登名科甲固已散見
於歷科之紀錄矣曷若刻於石列名於一堂之上為
尤愈也且散見者不能通知而會刻之則一舉目而
盡得之矣此邑令朱玉所以有題名碑記之請也夫
守令之職學校為首玉於既往之科甲猶必憺憺焉
圖為不朽如此則於今日訓勵之方其用心可知也
又推用心於民事亦可知矣然則玉之為令於蕭山
也豈非賢哉夫士君子懷瑜握瑾固皆有志於奮發
然亦必資于激勸鼓舞而作興之焉是故豐廩餼蠲
徭役廣科額以進用之此朝廷激勸之恩嚴教條督
課程勤講說此為師者激勸之方也時科試第優劣
公賞罰懲怠惰此邑長貳激勸之法也其教養之方
可謂至矣今又舉茲盛典以為學校之光榮蓋非以
諛既往也所以勸於將來焉俾在肄諸生日覩為冢
宰為太常卿為憲使憲副為監察御史皆得以光昭
金石乃曰彼人也吾亦人也吾何為而獨不然哉於

是莫不感發興起益勵厥志以期增光於前人此玉
敬舞作興又其激勸之大者也予謂玉為邑之賢令
誠不忝矣礪石既其玉乃遣庠生謁請予言志之玉
亦予徒也不可以辭遂書此為之記祭酒四明陳敬
宗永樂二十年蕭山縣志序
洪武聖朝運隆祚盛一
統華彝疆宇之大制度

之於越越千古故昔之圖志有不足以當其紀載者
猶歟盛哉乃者永樂十六年夏四月遣使天下重訂
志書務在文簡冊當事核而詳昔之失實者正之今
之當入者增之乃命府縣通文理官一員總其事而
儒士為之采輯焉蕭山實浙藩紹興之支邑也予時
忝宰是邑愧以菲材恭承明命乃與儒學訓導南昌
祝以中儒士邑人樓觀戴汝東張子俊靡間晝夜本
之舊志益以新得考往証今採摭禪補靡不備具既
繕寫正上進矣適儒士樓觀將以副墨錄諸梓以備
一邑之觀覽請予序冠其端夫蕭山古吳越之區為
浙東之上游山州之明麗民物之阜繁可記可書不
一而足者惜其無前志其為缺典也久矣間有事實

附于郡志以今觀之漏萬掛一議者不能無憾况歷年彌遠固革不同愈傳愈失其真將久不幾以成書為失實乎幸逢聖朝聿新斯典其為天下萬世之幸固大而為斯邑素缺典者幸為尤大也是志八卷其凡例一遵聖朝所頒降其間事實既詳且備予也雖不敢自謂然于一邑山川人物之類開卷則未必不盡在目中焉觀邑之故家有學有守采輯之勞功實倍之幾及矣私將發梓以傳故併書之裨觀之者庶知所自也云

宣德三年縣志序
予宰蕭山之明年邑之令張崇煥崇所修圖志示予且曰斯志之修也本乎舊志雖上承朝命然非邑令之賢慎重提董同志之士採摭裨補以成一代之盛典不幾有缺漏失實之謂矣乎惜乎書成將欲板行而令以秩滿去任弗克遂厥志副本雖渝未免有亥豕魯魚之患而吾邑之志終不可得為成書矣譬若掘井九仞而不及泉猶為廢井也深可慨焉後二年予以責賦抵京師獲與中書公張俊

粹為勸予惟斯志也所以志夫邑治之沿革山川之勝人物之盛風俗所尚土地所宜不一而足者既皆錄而上進將以昭示於天下後世豈特為一邑之私哉予承乏斯邑詎可不任其責以承其美乎洎歸遂借邑庠教諭陳顏仍伯齊重加考訂用錄諸梓以永其傳俾後之覽者井然有條粲然明白雖數千百載之下日之猶一日也如此則不惟前令之功不泯中書公之言不負而予之任責亦庶乎其可塞矣於是乎序令吳

弘治二年蕭山縣志序
秋官副郎永興曾汝方撰

與府蒞任之明年政通人和慨然有志于興舉廢典每閱府志恒病其載述不備用圖修續適朝廷纂修實錄禮部按故事奏行天下有司選通文學正官督屬採集事跡以進公實任之遵行如制事既舉乃曰志書之修斯其機也遂檄八縣命正佐官及選庠校生於今纂修所採事跡之外有關於治理風俗者悉錄送上將類編成志時蕭山長吏員缺張當視篆奉命惟謹因訪得舊志閱之見其間所載有未備者有

當畧者不能無增損之宜與同事庠生黃萃朱珙相與謀諸鄉邑縉紳得前所遺亡之實從而增之有不急于志者去之次第成編亦因舊而爲之也嗚呼今之志卽古之禹貢職方大而一省次而一郡又次而一邑則凡山川之險易風俗之淳漓與夫物產賦稅之登耗戶口人物之盛衰可以資考實爲監戒於治道有關者悉于此焉備在有司不可一日無此志誠爲政之先務也惜知之者寡若蕭山亦浙東名邑古志罔存始修于永樂壬寅再續于宣德丁未詎今六十餘年時非不久變故非不多一縣之內政務民風於志之所宜增益者悉皆缺畧將久而無傳非小失也孰之責歟果甚難而不之爲抑視之不急而然也吁其可慨也已幸我賢守爲此盛舉豈曰偶哉顧錄雖愚陋茲忝是責亦知所務信不敢謬於去取以獲咎于公論然耳目有所不逮遺名失實誠弗能免尚俟大手筆以足其未備庶幾爲全書姑僭引其端蓋不泯其所修之有

重輯蕭山縣志序

蕭山爲紹興屬邑居東浙上

江海之襟帶湖山之奇勝風物之阜厚名人才士之德望自昔甲於諸邑惜圖志未詳考見無據久爲邑之缺典宣德間雖有刻本顧其所載事蹟多舛詩文泛濫不足傳示爲木之灾者六十餘年弗克正之迨弘治戊申值朝廷纂修實錄事旣竣府因檄屬縣重修誌書時廷獻朱先生在邑庠爲衆推委實在其事採擇筆削之勞居多書雖垂成而詩文未備况其中或有傳疑襲訛之失蓋亦成于匆遽而旁考未暇也予因不揣蕪陋鉛槧之餘輒取而輯錄之妄以所聞增其未備而詳其畧正其失次而去其所贅姑以便已觀覽庶幾不忘邑之故實而已茲幸遇我邑侯莆陽朱君居正以名進士小試于邑賢明而有爲鳴琴之暇卽詢及是書廼命錄取予私本據以爲綿蕞而主議修纂仍屬予校正之嗚呼志非史有史之法也非具三長安可以與此况一邑之公書非一人之私見所能就而或考究不精去取不當則不足以昭公論傳實錄而垂信于後矣顧予庸淺末學佔畢瑋瑋安敢犯是不遑哉第懼失今不圖歷年旣遠遺亡益

甚後人將無自以考見一邑事蹟之全矣然則斯志之修誠今日之急務而為吾邑之光者不既多乎今既賴我賢侯作興是舉尚冀同志君子正其訛失補其遺缺相與成一邑之全書則凡山川之險易人才之盛衰物產之豐嗇風俗之淳漓政治之得失古今之事變一邑之內不出戶庭而可知千載之間一展卷而可見自足以傳示四方而垂信後世矣寧非吾邑曠古之盛典也哉錄既終敢僭書編末以識歲月云弘治十八年正德二年蕭山縣志序
正德改元之初蕭山奉命纂修孝廟實錄成僉謂所採宜收縣志以備考實邑大夫朱侯居正乃率予簡儒生黃懿丁洪朱孔毓相與編集永樂以前則取前令張侯崇所輯舊志宣德以後則取今解元田君惟祐所輯新稿仍遵國朝頒降凡例參諸周禮大司徒掌土地之圖小史掌邦國之志先之以圖繼之以志始于沿革終于題詠卷分為四條總二十有五可筆則筆可削則削數月而僅成書乃命邑士張雲繕寫壽梓事竣宜撮大要為來

者告按蕭山古會稽名邑上應斗牛下屬揚州在昔吳越僭據恃為險隘今隸紹興獨當西北要衝去杭州止隔錢塘又近省繁劇之所東抵錢清南盡勞嶺西至莊亭北限海門四圍皆江海之大中間廣袤三百餘里其山如北幹霧樓西山千巖萬壑不減于蓬島之麗其川如湘湖漁浦諸水雖西湖鑑湖之形勝何以踰之山川之秀鍾而為人物如鍾離牧操行精絕有古人風張孝伯參謀大政能解黨禁朱憲使獨持風裁而魏文靖德望尊重如此者實多高名美譽至今膾炙人口人物之盛習而為風俗男女有別而耕織惟勤絃誦相聞而文風益振矧宦遊如楊龜山以道化倡于前游定夫以德教闡于後羅豫章講道既去而李延平復來延平之去未久而朱夫！提舉浙東又至南渡以還諸貴家大族之子孫世守宗祧於此則人才風俗之造就良亦有所自矣迨我聖朝甄陶百餘年來學校人文車書貢賦之屬益隆于昔而是志所載其能免於掛一漏萬之誚乎昔江淹嘗言修史之難無出于志陳壽號善敘述李延壽亦稱

究意舊事然所著史傳甚詳而獨不克作志願予何人而敢爲此後之君子惜其舛訛損益訂正不止可備考實亦將可以勸懲乎後來此先師尼父所以因魯史而作春秋先賢晦翁所以因通鑑而作綱目無非爲世道計也况我先帝神功聖德所被尤足以垂憲萬世則今日纂修之意豈直爲目前典故謀哉邑侯之心豈亦切有望

嘉靖二十二年蕭山縣志序

林

焉訓導李遇春撰
來治蕭山旣敷政于民周覽其國之故則越王城在焉喟然而嘆以爲句踐之伯也黽勉爲生聚教訓且二十年意其所以撫循百姓必有條畫可爲後法而世遠漫不可考見豈非其圖籍散軼之故哉及攷近世吏於茲上者則自楊龜山游廣平而下得若干人其規措興革尚彷彿可見而吾後之人爲吏者猶得師之以治然又竊念以句踐之勳其震耀當時者爲何如而湮沒已若此則夫所謂近世良吏之治可考見者使更數百年又安知其不盡湮沒若此乎此昔人所以致嘆于文獻也夫師其治不若明著其迹以

示後之人之爲可久則纂爲志若干卷凡其吏治之汚隆風俗之上下大畧皆具書成則以請于予使序之予讀是書而有感于風俗之係乎所導也蓋昔者禹之君臨天下其會諸侯乃不憚千萬里而遠至于會稽吾意蕭山之在斯時其親睹于禹衣裳玉帛之所蒞也而其被化也必深其爲萬國之所聚而觀望也其風俗必甚美及句踐一變其俗則翹然有秦楚富强爭戰之習雖其爲禹之苗裔而禹之遺化且無復存矣今其規爲撫循雖不可考見即使可考見亦利機伯術君子所羞道若揚游兩君子得伊洛之傳以上泝於禹或者庶幾能以禹之治民者治禹之民乎雖然游楊之學或謂其不純於程氏而猶若疑似於二氏之間則其於姚奴精一之傳計亦不能無辨於毫釐者而其所以導民之路亦當與祗台德先者或少愧焉不知其在當時所以挽回蕭山之俗於禹之舊能乎否也夫精一之學根於吾心性命之不容已而措之於民是爲恒政稍過則流而爲二氏稍不及則流而爲伯功此其端甚微欲以禹之道治禹之

民者宜慎所取衷矣此林侯今日之責而亦侯之所
以纂是書之意也予爲之提其要以告職風教者云

山陰兵部郎 嘉靖三十六年蕭山縣志序 蕭山原有
中王機撰 志玉亭張

子燭承丹峯林侯策之委而摘萃成編僅十四年何
待于續耶續非得已也誌成之後海邦多事有沿革
有興舉前志所未及者可弗續耶皇威殄海東南底
寧城守鞏嚴兵防整輯田土清理賦役均平華江施
侯峴山魏侯後先協心終始相成皆志後之新政論
者謂宜錄以備遺魏侯公竣講學兵暇采風諸所未
備者搜擇以求實去取以求公如不得已焉續城建
所以封固守也續兵防所以慎武備也續倉庫所以
紀歛運也續清理所以覈土田也續賦役所以示均
平也地封以章家教節義以勸風俗廕敘以表世德
例貢制科悉著任使以章報効蕭居浙東王化之所
首及省治之所屏翰法制在有司教化在人才德澤
在民心則夫紀述新政贊揚盛美不容不續續焉不
能不詳其詳不敢不覈由是政有所資俗有所改後

來繼起有所承循魏侯其用心哉魏侯名堂字汝高
襄陽之世胄興都之巨儒也宰蕭有治行續志有史
才筮仕而發于此君子蓋深有望于石 萬曆十七年
渠金匱之用邑人工部主事黃九臯撰

蕭山縣志序 蕭山志粵古初靡按矣明興二百餘禩
無慮六易書而惟嘉靖志稱最體裁正

且謹嚴也然則曷爲而復葺之耶鑑雖明不加拂拭
則全翳無自明閱辛未迄今四十餘年竊慨夫鑑之
全翳也爰暨戴生文明蔡生大績張生諒昕夕採訂
平其衡以拂拭勒爲成書比類引之見所重輕據事
詳之便覽顛末而其凡例一準諸嘉靖志或曰嘉靖
志出令林公策孝廉張君燭諸生錢穀手輒有補遺
議其後今志準嘉靖倘復有是奈何余曰無之矣宜
志而舊未志者增入之舊以意削者復筆之府志畧
者更考而詳之奚遺而奚補哉蓋有之矣或百年論
定事乎譬如駝不加于千觔驥無軼于千里外力所
限也余安敢辭是役也余自好也
厝費自余不煩公帑溫陵劉會撰

國朝康熙三十二年蕭山縣志序

通邑者所以大一統也邑有志又通

志所取資疆域之分限戶口之登耗田賦之出入風俗之奢儉人物之升降制度之沿革山川原隰之通塞條分縷析開卷瞭然邑志蓋可忽乎哉蕭邑之志康熙辛亥歲撫寧鄒君之所重脩也遷延一紀屢更屢易歲癸亥 朝廷有纂脩通志之命各憲檄催邑志余涖任甫閱月刻期告竣其當與否未暇周悉也閱今十餘載因革又疊見矣江塘遷徙幾何處學署脩建幾何事鄉賢賓薦幾何人賦役紛更災祥屢告此志之不可不備載者也况前此載筆者委任多人各相牴牾或亥豕不可辨或首尾不相貫或抱殘而守缺或言重而事複嗟乎志以傳信信之不存志將安取亟欲釐正簿書未暇也因迺撮其大要與張君通可商訂之張君好著書習典故余信之有素果不余負已殫精聚力不間晝夜博采舊志益以新裁訛者正重者削缺者補上下不相聯屬者條貫而有序閱數月而復余謹之至也抑余更有說志邑乘也采

之即備國史也忠孝賢節不可溢為褒美也明甚何向哀輯者多失之濫耶後之從事于斯者與為要譽毋寧覈實與為負謗毋寧謹嚴于以報 嘉靖十一年朝廷而取信後世也可矣令劉儼撰

黃冊畧引

此吾蕭山新冊畧也冊載丁糧土田備矣奚取乎畧取其畧而易見撒不離總也夫

舊冊之於丁糧土田總不總撒不撒掛一而漏二詭避而不可稽吾甚病焉故不得已而為畧也何言乎畧約縣總覈之區約區總覈之里里覈諸甲甲覈諸戶漏使盈訛使正而舊管損之益之而為實在積戶為甲積甲為里積里為區積區為縣求之原額無爽也而新冊定矣以新冊之實在戶分之甲合之里聚區別而縣統之錄以為編而畧成矣然則惡乎錢錢之木俾邑人遍摹而藏之不變也冀同志者守而行之不變也又冀夫嗣而新之者不變也雖然畧豈易言哉一戶之實在不覈則一甲之總訛甲訛則里訛區與縣從可知矣是弊而又 嘉靖二十一年黃冊要弊也畧豈易言哉令張選撰

累引 天下之患莫大於官執其贖而民不及知下滋
其弊而上不及察夫不及知則愚之者至矣不
及察則玩之者至矣玩上愚民是故其弊將至於莫
之禁以尋於無窮已茲患也惟黃冊爲特甚夫冊籍
土田生齒將以覈實也其登耗貿易旬歲之間戶人
人殊故制如期必更新之俾無失實耳狡猾之徒緣
而變易增益那移飛灑其弊也合戶而求之至甲必
差合甲而求之至里必舛區與縣又甚矣老吏積弊
莫能致詰蚩蚩小民力不能請檢之官贖抱恨莫之
控以斃矣是可不可不爲之憫乎嘉靖辛卯歲舊令無
張公選編爲冊畧自縣而區而里而甲而戶有總有
散積戶爲甲積甲爲里積里爲區爲縣瓜分縷析無
毫髮爽其帙僅四而闔邑登耗之實具在故畧所由
名也夫畧約而易見覈而不爽上可以無不及察之
患矣梓而遍布之家喻戶曉下可以無不及知之患
矣二患去雖善狡猾亦無所售其智而冊始爲信書
故今蕭之民利之不衰茲歲予適攢造事竣因舊而
嗣之更名要畧覈實如張公而制加潤焉蓋無敢掠

公之美與忘民之利也梓既成舉使邑人藏之謹書
其樂以告諸同志之嗣者其無廢茲畧焉令林策撰
嘉靖三十一年清糧冊畧引 冊以載丁產覈徵科固
欲其詳也而何以畧蓋

上以防奸欲其備舉而下以自考取其易見此畧之
所由作也畧之在天下不多見而惟蕭山有之蕭山
亦始於無錫靜思張公公病夫飛詭者之莫能致詰
而賠納者之無以自明也乃爲是以授之人持一紙
可以自輸於官而莫之或欺民甚便也繼之以漳南
丹峯林公亦因之而不變非不變也不敢變也然皆
謂之黃冊畧而冊畧之名則自今始名之以冊畧者
何蓋蕭山舊多埒江無挨而江村沈太府深病焉因
民之請通一縣而丈量之出其墾田以補埒江均其
則耗以實無挨而賦役因以稱平然與黃冊之額異
矣乃爲實徵文冊陞任而議尚未定也嗣以宛溪梅
太府斷然舉而行之而民心始安是二翁之所以利
益乎蕭民者至矣余選時已聞蕭有良法但人咸以
不能奉行爲恐余嘆曰豈有作法於智而顧不能制

於愚哉故履在卽逢橫造而此法則首所奉行者也
 時勘合之命未下其撞出田耗則又不敢增入冊內
 乃為黃冊以遵舊額復為實徵以奉二公之法而民
 所輸之數則實徵是也故畧從實徵因名之曰冊畧
 而其實則二翁之美意也余敢攘之為已功哉至於
 補其消乏均其里役軍匠分田而不分丁桃源田出
 都而不入都富竈之分戶寄庄之串役則是畧之所
 以少變於前者也而其實則未嘗變也是亦不可變
 者也噫此張公志也亦蕭之士民志也為蕭令者幸
 無得罪於張公亦無得罪於蕭之士民令施堯臣撰

萬曆元年清量冊畧引

蕭山舊無冊畧有之自靜思
 張公始丁糧田土核實可睹

雖窮鄉僻壤戶曉家喻積書黠吏不得妄有變易所
 謂官執其牘而下及知下滋其弊而上及察誠有藉
 於茲畧也中更二三君子相與守之不變顧其間隨
 時損益變通宜民是所論於法之外而非拘泥者所
 與知矣故軍匠分田而不分戶桃源田出都而不入
 都富竈分戶寄庄串役是華江施公之畧少異於丹

峯者也禁竈匠之詭冒裁客附之影射均里甲之擬
 畧遠近之次是栢菴歐公之畧少異於華江者禮二
 畧雖有不同而宜民則一易曰窮則變變則通不其
 然哉余蒞茲土適屆大造深惟戶口國命攸基矢心
 惟慎故方開會而審圖也按圖先後示之以期寬之
 以日緩朴和顏廣詢詳斷如越里而願就近者悉聽
 復大家戶頭苦賠累者則分立之其人果貧而戶有
 新收則里長之詭寄也務令之改正其戶殷實而可
 反虧損是奸民之漏差也必責之報補竈戶絕詭民
 之宿弊單丁去卽名之重科歷周歲而事始竣余誠
 不敏民亦安吾之拙斯又余之自效其愚而少異于
 栢菴者非好異也隨時變通之道也使歐公而當今
 日吾知必有然矣嗚呼蕭之戶口非不息以蕃也土
 田非不墾且闢也而額數不加于舊者不忍以繭絲
 之累貽吾民也以六事按
 萬曆十年清量冊畧引
 予予亦何辭令王一乾撰
 區寓之廣戶口土田悉入版圖納諸天府矣制令天
 下州縣歷十年則一大造黃冊以清之維我蕭山前

政黃冊之外又為清量冊畧備在案贖以便稽查出
 舊賦而防欺弊蓋始自靜思張公以暨華江施公栢
 菴歐公養初王公咸遵承之其間稍有斟酌損益要
 亦與時消息通變宜民之方自不嫌其為貳也余受
 命茲土適當造冊取所為冊畧觀之歎曰勤矣美矣
 前人之心乎民也以富窳則析戶以寄庄則串役以
 詭寄則禁以影射則裁以里甲則均又或察民之情
 而為順之詰民之偽而為釐之其制周其防曲吾可
 守此以靖吾職乎會今朝廷責天下民牧重新丈量
 田土督報甚嚴余乃殫厥心力戴星出入徧履四境
 之遠邇以從事則見夫斯境壤土肥瘠迥別而歎瘠
 土之民之有病于賦役矣吁利害之不均茲其一歎
 又入其山而步之山有生息者是各花山且多寬畝
 其賦則五十畝以當一丁納兵餉銀兩其巉巖削确
 濯濯者是名光山賦止納鈔然今花山獨虧原額何
 哉奸民避重就輕那移脫漏滿嶺花干光積使然也吁
 隱蠹之未剔又其一歎去治最遠曰桃源十三十四
 都先冊以十一都之圖分里遙缺也及桃源之丁田

聚為一里以充之催徵者苦寫越稱不便吁民情之
 齟齬茲又其一歎俯躬以思治邑之政良不易哉奈
 非奉丈量之役遍涉土境亦惡能知此迺就開會審
 圖之際於肥瘠處所則別其糧需而俾偏累者平焉
 於花息山場則準勒丈數而俾寬漏者實焉於桃源
 兩都所芟者則歸之以便催徵而十一都圖所缺則
 另將各圖人戶之所便查補焉至若舊冊僧戶混雜
 於民今亦另以僧戶聚之為一圖凡此數者撫其不
 便以歸于便余惡能有加於前特因前人耳目偶未
 之逮而補之也是亦前政之緒也余何敢辭而曰有
 知乎哉冊竣事因書以
 引其端云令馬朝錫撰

國朝康熙三十年黃冊要畧引

黃冊之緒至贖而難
 覈黃冊之畧最簡而

易明欲執簡以理贖當從贖以就簡則冊畧其要矣
 粵自無錫張公慨夫蕭之丁糧土田總不總撒不撒
 掛一漏二詭僻而不可稽也自非殫精悉力而覈諸
 戶則甲無以約矣非殫精悉力而覈諸甲則里無以

約矣故其言曰畧豈易言哉其剔釐之心良苦而規
 示之意至深且遠也繼此涖邑者漳南林公華江施
 公後先各有所潤總不外乎張公之意而與為損益
 則生斯土與官斯土者宜何如兢兢守之而弗失歟
 奈之何至於今竟有駭心奪目焚若亂絲茫同望洋
 何啻掛一漏二也已試舉其概而論之撒不符總甲
 訛乎圖析戶以花分一田而重號歷數屆而詭寄猶
 未已也田十有一則糧額差等矣畧而弗載丁分鄉
 市銀米攸別矣忽而不詳山有花光之殊竟易花而
 為光圖避重也田有得利不得利之限竟跳甲而越
 都希免差也且缺溢之田撥補任意有遠近之不相
 蒙淳頑之不相類致追呼賠累莫可底極也自往迄
 今歷屆相承而丁糧土田沸如蝸蟪矣予于役茲土
 亟圖釐正會際大造不敢以寡昧難馴優游以任之
 爰首嚴細號之冊以立綱舉目張之序凡一戶之下
 田地山蕩必悉也丁糧銀米必悉也字號甲乙必悉
 也覈諸戶以約甲覈諸甲以約里俾里約而縣額犁
 然矣向之花分者摘其尤而歸之重號者核其詳而

豁之詭寄者抑富扶貧諭令開而收之暨夫糧額必
 分等則丁口必分鄉市山清其號而花光咸有攸分
 田定其鄉而得利不得利各歸其圖額有溢必撥新
 收甲有缺務補頓戶令品搭而各擇其親順里甲而
 悉安其舊將見自忘其編圖之勞而輸將各適此予
 之殫精悉力返至曠而歸於寂簡則此一冊也實與
 魚鱗相表裏頌正冊於各里藏副本於縣架一展卷
 而較若列眉自張林諸君子創冊畧於嘉靖十有一
 年至今康熙辛未歲約一百五十載將墜之籍謬為
 關其緒而修明之以志前人作法之良冀後人充潤
 其美庶於是乎復垂諸 蕭山賦 教諭金華趙子漸撰
 來禱云廣川劉儼撰 蕭山賦 粵若蕭山之形勝也
 維哉偉乎分巒時句踐之域長江界吳越之區浮虹
 跨山陰兮其程繁乎諸暨漁川指春江兮其源出乎
 桐廬都三八而岐分兮鄉十五而環布西陵通南北
 之商古驛候往來之使亭竈課煮海之程鄉民羨湘
 湖之利或蠶絲以資生或力田以輸賦若乃縣治爽
 塋市井周匝車馬駢闐縱橫阡陌上下之岸人烟囂

雜東西之橋盤販雲集土產所宜品類不一春波漾
 湘水之尊秋霜染固陵之橘夏里瑩點朱之櫻佳山
 拆如拳之栗給長山之薪炭利小江之舟楫廣鳳凰
 之竹筍集兔沙之紙角穀雨採茗山之芽端陽鬪仙
 崑之藥羅東暨之野雉拾龕山之海錯名園貴水仙
 之花市橋品淵明之菊均大小之興販資富貧之可
 給且夫習俗奔競詞煩案牘明宰廉勤解求民瘼爰
 集俊彥起廢興學晨昏閭里絃歌聲續至若境界蕭
 爽風景或殊騷客宦游寄隱于茲江寺表文通之第
 許寺著元度之居夏暑造竹林而借爽春晴訪桃源
 以追娛至如名門望族衣冠赫奕仞墻環待制之府
 茂林隱尚書之室王菴崇侍郎之墓重興鎮徵君之
 宅荆榛荒厲帥之址莊園積史官之粟矧興廢之或
 異諒地靈而人傑彼科第之文人紛宏達于今昔嗚
 呼江山險阻兮古越故疆人才淵藪兮夢蕭山三政
 筆故鄉偉衣冠之塵蹟兮茲感慨以成章
 或問蕭山三政何謂也黃山人曰第一江村沈

役申文第三施侯申請該催排年代糧長徵運本圖
 稅糧原稿三政切蕭山民瘼而紀之也或問蕭山政
 止于三乎山人曰蕭山各宦所及聞者朱侯栻阮丞
 璉王侯聘張侯選林侯策後先相望留神蓄慮灌注
 醇馥于邑之士民善政典則奚止三哉然非可比而
 同也或問所紀何以切蕭民之瘼山人曰蕭山地當
 水陸之衝民力官逋日益可憫竭力耕作而不能給
 其家者全區糧長之累甚酷也無藉之該催排年外
 縣之官家寄籍即為糧長之蝨蠶而水頭折閱亦果
 有之加以地遠面生狡狴撥制徵收愆期供費浩繁
 焉得而不賠累哉是必該催徵糧之便民也蕭民久
 欲援他縣之例該催帶徵未得如其所請蓋因黃冊
 相沿排年世守里役之後排該催糧富者少而貧者
 多山野貧民一籌不展鄉市無藉百計侵漁焉可在
 錢糧之寄哉是必均平里役之便民也識者欲均里
 役則富家之田不掛戶而受寄之戶非其田田土之
 糧不隨人而採糧之戶全無產匿膏腴而日之為坊
 江有開除而不歸于實在買閑者以計脫為幸攬役

者以招收為能雖欲均之而不得其實是必清理田糧之便民也江村沈郡伯清理田糧而各歸本戶則戶有恒產矣華江施邑侯均平里甲而析撥如數則役有定式矣輪該催糧之年命認糧運所收止于本圖則彼此互役而不欺排役各有年分則賦役適均而不偏向非沈公孰清其源非有施侯孰處之當心源相授始末相成三政備之矣或問三者何以謂之政乎山人曰政者正也所以正人之不正也今刻案驗申稿歷歷所指悉中肯綮自非正色臨之悉心體之則狡且富者日恣肆而朴茂之民日受抑矣三政之出宿弊一洗貧富安業詭詐息滅愚不敢欺是正已而物正民均而無貧焉得不謂之政乎或問沈公以受謗去而子以正已歸之何也山人曰沈公修政復古清查田土為貧民也勢豪何利焉蘇子瞻所謂恩德已厚怨讟易生者勢所必至為民而勞心為民而受謗民自知之公自安之得失何損益哉遇不遇數也君子據理論事而數不與焉或問咸則三壤勘合糧長古制也山陰以為擾民而蕭山以為善政可

乎山人曰則壤成賦以土均之法辨十有二壤之名物以教稼穡古制也但魚鱗圖籍久而散佚矣推收不常畦畛數易移近換隴漫不省識積弊日久未流滋蔓大抵大獲之田開下則而上則之田未必稔期江之田不濱水而親墾之田不自實大戶寄田於富竈而鹽丁影免則雖數十頃而無力差之繁奸豪灑糧于下戶而貧老賠累則雖十數年而無敗露之日指膏腴為坵江則糧差可得而飛灑也徵貧老之賠逋則富家可得而坐笑也摘茅簷為里長則華屋可得而買閑也擠中戶為糧長則里老市僧可得而脅詐也竈丁受寄以免差起家無藉攬田以認役覓利民偽日滋名實乖戾則壤之法廢土均無可辨也清查其容緩哉山陰事體所未知者要非得利者未便則慮事者未精也若讓量出之田于重則寬步弓之數于水鄉山陰亦是心服豈可以彼而泥此哉至于勘合糧長之制畿郡州縣亦該催帶徵本府新昌尚書何公奏准該催收運免僉糧長數十年來民甚稱便蕭民久欲比例而不可得今觀施侯申稿言昌慮

遠竊欲求爲永例若寃勘合之制畿輔亦該催運繳而况下邑耶若究則壤之制揚之下下近乃爲全賦之入青之上下近容有不耕之田要之治道因時者也泥古而不宜于時治亦不足觀矣故善學古者得飲之正不必曩爵也得食之正不必籩豆也得衣之正不必冕弁也得書與文之正不必科斗墳典也江村郡伯清查田土而得實華江邑侯分析里役而適均該催供賦而早達酌古之典時制之宜也雖未必事事當可人人悅之然田無匿糧灑糧詭寄者不久而歸戶矣役有定式全區賠累者分任而更役矣惟後來董冊之賢覈實而調劑之善政寧有窮耶蕭山西捍大江北接省治東濱明台南環諸暨陸海衝疲日不暇給東南小警加以防江守城之役公使絡繹輒有輿皂廩舟之需稍不如意箠楚不勝戶樞車轂開闔突撞早暮酬答跋鱉困踣蕞爾小邑當方千里之控制省治諸暨倚以爲安坐視而不顧我知必無是也均之屬邑苦樂不均如此愚民欲徹白洋弓兵以充龕山之守借諸暨工食協濟西與之用申復湖

州久假不歸之北折分墾泌浦不耕代賦之湖田額辦且不敷也派辦合行于腹裏而何槩及于衝繁民兵不容已也勇士合取諸山邑而何重役乎劇地亦肅政所當議者乘闖邑耆長之請露其緒于簡端邑人黃九臯撰